

重脩鳳翔府志

第七册

鳳翔府志卷之七

人物

聖賢 孝友

名臣 儒行

忠烈 文苑

勇畧 義行

忠直 隱逸

宦績 流寓

方外 雜傳

雜技

夫地以人重人由地靈鳳郡自姜水發祥岐山叶瑞  
聖哲先後挺生猗歟盛矣嗣是而特出者雖所豎立  
大小不同然以德以功以才以事代有人焉謂非蜿  
蜒靈淑之故歟夫採風者善善從長其或一名一行  
沉沒未彰固宜並加搜羅著之簡策以垂不朽而他  
如方外雜技僑寓名流雖於地無關輕重然亦紀跡

重修鳳翔府志

卷之七 人物

一

者所不廢焉志人物

聖賢

上古

炎帝神農氏姜姓母曰女登有媧氏之女為少典妃感  
神龍而生帝長於姜水因以為姓代女媧氏而作以  
火德王故曰炎帝以火名官劉揉木始為耒耜教稼  
穡故號神農氏作蜡祭以赭鞭鞭草木嘗百草始制  
醫藥又作五弦之琴教人日中為市交易而退各得  
其所重八卦為六十四爻初都陳後居曲阜在位一

百二十年崩詳見三皇本紀

**殷**

古公亶父公劉 世孫也居邠狄人侵之事之以珠玉犬馬俱不得免乃囑耆老而告之曰狄人之所欲者吾土地也君子不以養人者害人我將去之去邠踰梁山至於岐山之下居焉邠人曰仁人也不可失也從之者如歸市後武王克商追王太王

泰伯仲雍皆太王子也太王三子長泰伯次仲雍次季歷季歷又生子昌有聖德太王欲傳位季歷以及昌

重修鳳翔府志

卷之七 人物

一一

泰伯知之卽與仲雍逃之荆蠻魯論云泰伯其可謂至德也已矣三以天下讓民無得而稱焉

王季太王第三子史記本紀曰公季修古公遺道篤於行義諸侯順之公季卒子昌立是爲西伯

文王王季子遵后稷公劉之業則古公公季之法篤仁義敬老慈少禮下賢者士多歸之崇侯嚭於紂紂囚西伯於羑里閔天之徒求有莘氏美女驪戎之文馬有熊九駟他竒怪物獻之紂乃赦西伯賜弓矢斧鉞使專征伐西伯獻洛西之地請紂去炮烙之刑紂許

之西伯陰行善諸侯皆來平決於是虞芮之人有獄不能決乃如周入界耕者皆讓畔民俗皆讓長虞芮人慙相謂曰吾所爭周人所恥何往爲俱讓而去諸侯聞之曰西伯蓋受命之君明年伐犬戎明年伐密須明年敗耆國明年伐邠明年伐崇侯虎而作豐邑自岐下而徙都豐

**周**

虢仲虢叔文王弟傳曰虢仲虢叔王季之穆也爲文王卿士勲在王室藏於盟府

重修鳳翔府志

卷之七 人物

三

燕伋

家語作級

亦字子思秦人夫子適周問禮時從之道成

而歸居於汧河西南山下相傳古名魯家村

宋陳知微贊曰

八九之徒具傳大義賢哉子思道本無愧鍾靈咸鎬

浴德洙泗增封汧源皇澤斯被

聖門人物贊曰

師席高振大

成是集道傳一貫速肖七十善教云哀儒風可立漁

陽之士得跂而及

**宋**

張載字子厚郾縣人少喜談兵至欲結客取洮西之地年二十一以書謁范仲淹一見知其遠器乃警之曰

儒者自有名教可樂何事於兵因折節讀書講求六經旁及釋老嘗坐虎皮講易京師聽從者甚衆一夕二程至與論易次日語人曰比見二程深明易道吾所弗及汝輩可師之撤坐輟講與二程語道學之要舉進士爲祁州司法叅軍雲巖令政事以敦本善俗爲先熙寧初御史中丞呂公著言其有古學召見問治道對曰爲政不法三代者終苟道也帝悅以爲崇文院校書明州苗振獄起往治之還朝卽移疾屏居南山下終日危坐一室敝衣蔬食與諸生講學論定

井田學校之法皆欲條理成書使可舉而措諸事業會秦鳳帥呂大防薦其學善發明聖人之遺旨宜還其舊職以備諮訪乃詔同知太常禮院與有司議禮不合復以疾歸卒於道淳祐元年封鄜伯崇祀孔子廟庭

名臣

**漢**

馬援字文淵扶風人三兄况余員並有才能爲二千石援少有大志王莽未避地西州隗囂甚重之時公孫

述稱帝於蜀囂使援往觀歸謂囂曰子陽井底蛙耳  
建武四年囂使援奉書洛陽引見於宣德殿頓首曰  
陛下恢廓大度同符高祖帝王自有真也帝壯之及  
還囂遣子入質尋反援上疏自陳帝乃召援計事援  
於帝前聚米爲山谷指畫形勢帝曰虜在吾目中矣  
明旦進軍囂衆大潰十一年拜隴西太守擊破先  
零羌於臨洮時朝臣以金城破羌之西道遠多寇議  
欲棄之援不可奏爲置長吏繕城郭起塢堠開導水  
田勸以耕牧郡中樂業視事六年徵入爲虎賁中郎  
將十七年交趾女子徵側徵貳反拜援伏波將軍將  
兵緣海而進至浪泊與賊戰破之斬徵側徵貳封援  
爲新息侯乃擊九真賊都羊等自無功至居風嶠南  
悉平二十年振旅還京師時匈奴烏桓尚擾北邊援  
拊髀嘆曰男兒當死於邊以馬革裹屍還葬耳會烏  
桓寇扶風援遂請行明年出高柳虜遂散去二十四  
年復請征五溪蠻夷會暑甚士卒多疫死援亦病困  
帝使虎賁中郎將梁松監軍會援卒遂因事陷之帝  
大怒追收新息侯印綬建初三年肅宗追諡曰忠成

侯

班超字仲升彪之少子爲書生時有相者曰生燕頤虎額萬里侯也家貧傭書養母一旦投筆嘆曰大丈夫當立功異域以取封侯安能久事筆硯間乎久之顯宗問固卿弟安在固以實對因除蘭臺令史尋爲假司馬使西域以三十六人到鄯善鄯善王廣陽禮超而陰通他國使超乃縱火燒殺他國使百餘人鄯善震怖納子爲質以超爲軍司馬時竇固欲益超兵超曰願將本所從三十餘人足矣如有不虞多益爲累

竟以三十六人數立奇功西域五十餘國悉皆納質內屬封超定遠侯在絕域三十一年濱老思鄉上書乞歸曰臣不敢望酒泉郡但願生入玉門關女弟昭亦爲超上書帝乃徵還使任尚代爲都護

耿弇字伯昭扶風人年二十一會王郎詐稱成帝子興起兵邯鄲弇獨馳北上詣光武因說發兵以定邯鄲大破王郎拜大將軍與吳漢北發幽州十郡兵擊破銅馬高湖赤眉青犢等賊建武二年封好畤侯五年進討張步大破之帝曰將軍前在南陽建此大策常

以爲落落難合今有志者事竟成也所平郡四十六  
攻城三百未嘗挫折每有四方異議輒召入問籌策  
卒諡曰愍侯

竇融字周公扶風人王莽居攝中以軍功封建功男莽  
敗以軍降更始趙萌薦爲鉅鹿太守辭爲張掖屬國  
都尉更始敗行河西五郡大將軍事政令寬和上下  
相親羌胡震服光武卽位決策東向遣長史劉鈞奉  
書獻馬帝賜璽書授爲涼州牧是後屢與帝通書問  
謀攻隗囂囂旣平封安豐侯仍還所鎮後入朝遷大

重修鳳翔府志

卷之七 人物

七

司空恩禮甚厚融謙讓畢至卒年七十八諡曰戴侯  
竇武字游平融之玄孫也封槐里侯拜城門校尉在位  
多辟名士清身疾惡禮賂不通訓戒子姪甚嚴大小  
莫敢違犯永康元年上疏申理黨議有詔原李膺杜  
密等諸獄繫囚罪輕者皆出之靈帝立論定策功更  
封聞喜侯拜大將軍常居禁中與陳蕃謀誅宦官爲  
曹節王甫等所害

魯恭扶風人宰中牟專以德化不任刑罰邑人許伯等  
爭田令不能決恭爲平理曲直皆退而相讓其治邑



有三異蝗不入境化及禽獸豎子有仁心河南尹上書言狀帝竒之官至司徒在位選群高第爲列卿郡守而門下耆生或不蒙薦舉有望者恭聞之曰學之不講是吾憂也終無所言

法雄字文疆郿人除平氏長善政事好發摘姦伏盜賊遠遁吏人畏愛之南陽太守上其理狀遷宛陵令永初三年張伯路等寇濱海復與劉文河等合黨入高唐帝徵雄爲青州刺史遣御史中丞王宗發幽冀諸郡兵併力討之連歲破賊收獲甚衆會赦詔到賊以

軍甲未解不敢歸降王宗以爲當擊雄曰勇不可恃勝不可必賊若乘船浮海深入遠島攻之未易也既有赦令可且罷兵以慰其心俟其解散然後圖之可不戰而定矣宗善其言卽罷兵賊聞大喜卽還所畧人而東萊郡兵獨未解甲賊復驚逸據海島復抄東萊間雄率郡兵擊破之遷南郡太守郡有雲夢藪澤多虎狼之暴前太守募賞張捕反爲所害雄乃移書屬縣曰古者至化之世猛獸不擾皆由恩信相及太守雖不德敢忘斯義其毀壞檻穽不得妄捕山林是

後患稍息人亦獲安在郡數歲常豐稔元初中卒於

官

入鄉賢祠

長孫無忌隴州人佐太宗定天下官太尉封趙公圖像

凌烟閣第一廣輿記云河南洛陽人未詳孰是

王珪字叔玠郿人隋開皇十三年召入秘書內省讎定羣書爲太常治禮郎高祖入關李綱薦署世子府諮議叅軍太宗卽位召拜諫議大夫推誠納善每存規益甚被委任帝以珪善人物且知言謂曰卿與元齡諸子孰賢對曰孜孜奉國知無不爲臣不如元齡兼

重修鳳翔府志

卷之七 人物

九

資文武出將入相臣不如靖敷奏詳明出入惟允臣不如彥博濟繁治劇衆務必舉臣不如胄以諫諍爲心恥君不及堯舜臣不如徵至激濁揚清疾惡好善臣於數子有一日之長帝稱善元齡等亦以爲確論進封郡公拜禮部尚書兼魏王泰師王問珪何所習珪曰漢東平王蒼稱爲善最樂願王志之帝喜曰兒可以無過矣卒贈吏部尚書諡曰懿

忠烈

子車氏三子奄息仲行鍼虎爲秦大夫穆公卒三子殉  
國人爲之賦黃鳥

**漢**

馬騰援之後建安中與董承等受帝衣帶密詔謀誅曹  
操事覺奔涼州踰年被詔謁帝於麒麟閣帝揮涕諭  
以匡扶漢室紹休乃祖騰復與侍郎黃奎合謀誅操  
不克遂同二子欽休遇害

**唐**

段秀實汧陽人沉厚能斷慨然有濟世意天寶四載從

重修鳳翔府志

卷之七 人物

十

馬靈譽討護密有功授安西府別將肅宗在靈武同  
李嗣業赴行在代宗幸陝勸白孝德入援朱泚反時  
爲司農卿泚遣韓旻將銳師三千聲言迎駕實襲奉  
天秀實倒用司農印追其兵旻得符而還秀實謂同  
謀曰旻還吾等無遺類矣當直搏泚殺之不克則死  
終不爲之臣也泚召源休及秀實等議稱帝事秀實  
勃然起奪休象笏前唾泚面大罵擊之中顙流血泚  
匍匐走秀實大呼曰我不同反胡不速殺我遂遇害  
興元元年贈太尉諡忠烈

劉感岐州人武德初以驃騎將軍戍涇州爲薛仁果所圍糧盡殺所乘馬饗士以城陷被執賊令約城中降感給諾至城下大呼曰賊大飢亡在朝暮秦王數十萬衆且至勉之無苦仁果怒射殺之賊平高祖祭以少牢贈瀛州刺史諡忠壯

楊大寶天興人爲龍門令劉武周攻之死於守贈全節侯

**宋**

張達郿人靖康末刺吉州金師圍太原引兵赴援力戰

重修鳳翔府志

卷之七 人物

十一

死之

**金**

劉興哥號縣人爲楊沃衍部將率兵往來邠隴間屢戰屢勝大軍猝不能東下後於清化戰死大兵至酹酒以弔

**明**

侯郡鳳翔舉人由教諭擢輝縣令兼攝汲縣事世廟幸承天次衛輝行宮火郡奮身救護遂焚死祀忠孝祠袁應泰鳳翔人由永平道陞遼撫適熊廷弼被論代爲

經畧天啟元年三月

王師臨遼城公與巡按御史張銓等分陴固守至二十三日城陷遂登樓拜疏佩印劍自裁內姪姚居秀遣之

不去死於公側僕唐世明撫屍大慟焚樓而死

祀鄉賢祠

屈學曾鳳翔諸生流寇起當事檄屬邑各鄉勇爲守禦

計學曾自承其事及賊趨鳳翔督衆力戰陷陣死

劉之勃字安劉鳳翔人由行人擢御史上節財六議又

陳東廠三弊帝皆納其言命巡按四川及賊逼成都

蜀王投井死之勃被執賊以同鄉欲用之之勃勸以

重修鳳翔府志

卷之七

人物

十二

不殺百姓輔立蜀世子不從遂大罵求死賊酷苦之

終不少屈臨死語賊曰寧多剗吾肉勿濫殺百姓遂

攢矢射殺之姪文郁抱尸號慟觸樹死院吏石璞殞

之西門外

祀鄉賢祠

牛養傑岐山人知延津縣坐剛直免歸闖逆之變衣冠

向闕北拜罵賊死

李樹聲岐山人知猗氏縣丁內艱不復仕闖逆建號長

安徽之樹聲曰吾家六世受國恩今安往乎卽夕呼

天而逝

楊畏知寶雞人崇政末爲雲南副使張獻忠將孫可望入雲南與劉文秀西畧畏知拒戰敗投水不死踞而罵可望以畏知同鄉慰之曰聞公名久今爲討賊來相與匡扶明室非有他也畏知曰果爾當從我三事一不得用僞西年號二不得殺人三不得焚廬舍淫婦女可望皆許諾及

王師破廣州永明王走南寧畏知奔赴行在遂留爲東閣大學士可望聞之怒使人召至貴陽面數責之畏知大憤除頭上冠擊可望遂被害

重修鳳翔府志

卷之七

人物

十三

楊威寶雞人由武舉官守備流寇犯境與邑令嚴夢鸞共守城多所斬獲一日搜賊於谷中遇伏力戰而死王者賓鳳翔人令興濟以耿直不合當道致仕歸崇政癸未闖賊破鳳翔不食數日兄弟強飲食之復蘇後流寇賀琛襲鳳翔被執索金帛者賓大罵賊擊其頰聲愈厲賊以刀刺口中猶含血噴賊罵如初

祀鄉賢

王玘扶風舉人歷陞郎中出知承天府旣報陞鄖陽副使將去任流寇驟至併力攻城玘守禦完固忽撫標降丁內潰玘憤甚躬於城上執刀血戰力竭被執罵

不絕口賊百計脇降不從怒令殺之玘望闕四拜引  
領受刃

劉心傑麟遊庠生流寇之變城陷被執賊使之跪曰我  
大丈夫豈屈膝以求活耶遂罵曰汝居王土食王粟  
陷王城池殺王士民皇天后土必不汝容引頸受刃  
以死

張繼孟扶風進士擢南京御史奉命巡江極陳江防  
八要尋以不立魏璫生祠削籍璫敗起補山東道御  
史遷四川西道副使崇政甲申流寇張獻忠陷成

重修鳳翔府志

卷之七

人物

十四

都被執不屈死之妻賈氏亦以死殉

張遇留寶雞庠生李自成陷京師飲泣不食投繯以救  
解賊黨五閩王率衆掠村堡遇留忿甚給與飲酣伏  
壯士捶殺之賊婦以擅殺平民訟遇留械繫拷掠體  
無完膚問官鞫之遇留曰崇政皇帝英烈仁聖爲賊  
逼死生恨不得食其肉而寢其皮今冒死剪其黨亦  
爲崇政帝報讎耳大憲義之以事

上聞詔嘉其忠義授藍田教諭

孫承教扶風舉人流寇攻城承教同知縣王國訓協力

捍守備極勞辛城破殉難

郝珊隴州貢生以訓導守節死

王鼎安鳳翔人聞逆賊據陝僭號將犯京師頓足大哭

痛憤不食及京師不守驚曰皇上南遷乎遂一慟長

號而死

崇政七年流寇陷隴城一時死者五十三人俱經題

請以殉義表揚建祠今列其姓名於左

金鯉化

千總

王授命

把總

王

珩

授命子

王

愛

州吏殺數賊死

劉波

任三才

尹相湯

閻三綱

俱紳士

重修鳳翔府志

卷之七

人物

十五

張斗

閻紘

王希賢

俱貢士

閻珩

焦宗性

殷學尹

俞際飛

强以恕

殷紹陽

宋亂

李永茂

邱憲文

閻舜卿

閻光忠

楊體亨

韓演

閻完

楊世浩

莫自高

李隆

馮復志

楊世燁

李皓如

焦自和

馬尚健

閻光斗

閻光極

劉曰生

周儒

楊徵

李國柱

尹得民

李粹

張續

李時中

梁佐主

董儒

强聰

閻光寰

張應世

俱生員

艾之厚

耆賓

蘇來聘

鄉民

李國棟

張以德

閻光啟

俱街民



國朝

安尼恭郿縣庠生順治二年流寇賀琛破城被執不屈  
大罵琛怒甚寸磔以狗

陳仕龍郿人逆賊掠郿同令宋永譽典史傅弼堅守及  
城陷咸被執宋與傅不屈死之仕龍見令等遇害憤  
然怒大罵賊而死

李增廣鳳翔武生順治四年土寇李啟陽據麟遊聚衆  
侵掠道府以增廣多勇畧俾督其衆禦賊及賊破乘  
勝逐北馬蹶被執不屈死之

重修鳳翔府志

卷之七 人物

十六

白旗郿縣人由歲貢除蘭州訓導順治五年米回子寇  
蘭州城陷罵賊殉難事

聞贈國子監學錄

賜祭一壇

勇畧

周

白起郿人善用兵事秦昭王爲左庶長攻韓魏於伊闕  
斬首二十四萬拔五城遷爲國尉涉河取韓安邑以  
東攻魏取城六十一攻趙拔光狼城攻楚拔鄢鄧五

城拔郢燒夷陵遂東至竟陵遷爲武安君秦使王齮  
攻韓上黨上黨民走趙因攻趙趙使廉頗將堅壁待秦  
秦相應侯使人行反間趙因使趙括代廉頗秦乃陰  
使武安君爲上將軍趙括至擊秦軍秦軍佯敗趙軍  
逐勝秦出奇兵絕趙糧道趙卒不得食四十六日括  
自搏戰秦軍射殺括括軍四十萬降武安君盡坑殺  
之韓趙恐幣賂應侯使罷兵後秦王復發兵攻趙武  
安君稱疾不行秦王强起武安君稱病篤王怒免爲  
士伍自殺

漢

耿舒况子况更始時爲上谷太守光武北伐代令張曩  
據城反叛光武以舒爲復胡將軍使擊曩破之五校  
賊二十餘萬北寇上谷舒與况連擊破之賊皆退走  
彭寵叛光武遣祭遵劉喜以拒寵寵遣弟純將匈奴  
二千餘騎寵自引兵數萬分爲兩道以擊遵喜胡騎  
經軍都舒襲破其衆斬匈奴兩王寵乃退走復與况  
攻寵取軍都寵死封牟平侯  
馬防援次子歷官城門校尉建初二年金城隴西保塞

羌皆反拜防行車騎將軍事將北軍五校兵及諸郡積射士三萬人擊之軍到冀而羌豪布橋等圍南部都尉於臨洮防欲救之臨洮道險車騎不得方駕防乃別使兩司馬將數百騎分爲前後軍去臨洮十餘里爲大營多樹幡幟揚言大兵旦當進羌候見之馳還言漢兵盛不可當明旦遂鼓噪而前羌虜驚走因追襲破之斬首虜四千餘人戰於索西又破之布橋降徵還拜車騎將軍封潁陽侯後改封翟鄉侯

班勇超少子幼有父風元初六年北單于與車師後部

攻沒長史索班衆議欲閉玉門關遂棄西域勇歷陳不可棄之狀遂復置西域校尉延光二年夏復以勇爲西域長史將兵五百人出屯柳中諭降鄯善龜茲擊破車師後部捕得匈奴持節使者將至索班沒處斬之以報其恥於是車師六國悉平復追斬呼衍王貴人骨都侯呼衍王遂徙居枯梧河上後請攻焉耆王元孟受降後期免卒於家

耿秉國之子能說司馬兵法尤好將帥之畧以父任爲郎數上言兵事永平中拜謁者僕射上嘗訪以邊事

十五年拜駙馬都尉與秦彭竇固等俱伐北匈奴虜  
皆奔走不戰而還十七年復擊定車師肅宗卽位拜  
征西將軍章和二年副車騎將軍竇憲擊北匈奴大  
破之封美陽侯卒諡曰桓侯

耿夔國之子爲大將軍左校尉將精騎八百出居延塞  
直奔北單于庭於金微山斬閼氏名王已下五千餘  
級單于與數騎脫亡盡獲其珍寶財畜去塞五千里  
而還自漢出師所未嘗至也元興元年爲遼東太守  
貊人寇郡界夔追斬其渠帥永初三年車騎將軍何

熙推夔爲先鋒擊南單于斬首千餘級殺其名王六  
人獲穹廬車重千餘兩馬畜生口甚衆建光中鮮卑  
攻雲中拜夔度遼將軍與幽州刺史龐參追之出塞  
後坐法免卒於家

竇固少喜兵中元元年襲父友封顯親侯十五年冬拜  
奉車都尉與騎都尉耿忠等率兵至天山擊呼衍王  
斬首千餘級加位特進明年復出玉門擊西域破白  
山降車師在邊數年羌胡服其恩信建初七年代馬  
防爲光祿勳復爲衛尉卒諡文侯

耿恭國弟廣之子永平十七年騎都尉劉張出擊車師  
請恭爲司馬破降之又爲戍校尉屯後王部金蒲城  
恭至部移檄烏孫示漢威德皆歡喜遣使獻名馬願  
遣子入侍明年匈奴破殺後王安得而攻金蒲城恭  
乘城搏戰以毒藥傅矢發強弩射之虜以爲神遂解  
去七月匈奴復來攻恭據疏勒城虜於城下壅絕澗  
水城中穿井十五丈不得水乃北向再拜爲吏士禱  
有頃水泉湧出衆稱萬歲令吏士揚水示賊賊出不  
意以爲神明遂引去會顯宗崩車師復叛與匈奴共

攻恭食盡被困虜遣使招恭曰若降者封白屋王恭  
給其使上城手擊殺之單于大怒益兵圍恭不能下  
尋上遣征西將軍耿秉救之車師復降歸至玉門止  
餘十三人形容枯槁中郎將鄭衆上疏稱恭節過蘇  
武於是拜騎都尉謁者李譚誣奏恭免官卒於家  
馬超騰子勇烈過人初在涼州與曹操拒於蒲阪操曰  
馬兒不死吾無葬地矣後與從弟岱歸降昭烈拜左  
將軍卒諡威侯

馬仙琕郿人永元中累有戰功擢寧朔將軍蕭衍兵起四方多響應因使人說之仙琕斬以殉持兵於江西日鈔運漕建康城陷號哭經宿檻送至石頭衍親釋其縛遂事之每從征討勇冠三軍遷至義陽太守累破山蠻郡境清謐岫山民殺琅邪太守以城降魏魏徐州刺史盧昶以步騎十餘萬赴焉詔仙琕赴討累破之昶遁走魏衆免者十一二收兵糧牛馬器械不可勝數仙琕在邊境常單身潛入敵庭伺知壁壘村落險要處所故戰多克捷士卒亦甘爲用卒諡口剛

陳

魯悉達郿人起家梁南平王中兵參軍侯景之亂悉達招集晉熙等五郡盡有其地使其弟廣達領兵隨王僧辯討侯景景平授江州刺史高祖遣趙知禮授征西將軍送鼓吹女樂悉達受之不就高祖遣沈泰襲之不能克齊遣慕容紹宗來攻鬱口諸鎮悉達與戰敗齊軍紹宗僅以身免王琳欲圖東下以悉達制其中流頻遣使招誘悉達終不從琳乃連結於齊齊遣高岳助之相持歲餘會裨將梅天養等引齊軍入城

悉達勒麾下數千人濟江歸高祖授平南將軍北江州刺史封彭澤縣侯世祖卽位進號安左將軍遷吳州刺史遭母憂哀毀過禮因邁疾卒諡曰孝侯

魯廣達與兄悉達平侯景之亂加員外散騎常侍高祖受禪授征遠將軍尋除假節信武將軍隨吳明徹討周迪於臨川每戰功居最仍兄悉達爲吳州刺史授都督南豫州諸軍事南豫州刺史大建初與儀同章昭達入峽口拓定安蜀等州鎮時周氏將圖江左大造舟艦於蜀并運糧青泥廣達將兵掩襲縱火焚

之以功增封仍還本鎮五年衆軍北伐畧淮南舊地廣達與齊軍會於大峴大破之進克北徐州授都督北徐州諸軍事徐州刺史入爲右衛將軍十二年都督郢州諸軍事後主卽位入爲安左將軍二年授安南將軍拜侍中改封綏越郡公及賀若弼進軍鍾山廣達率衆於白土崗南置陣躬擐甲胄手執桴鼓率勵敢死冒刃而前殺傷甚衆及弼攻敗諸將乘勝至宮城廣達猶督餘兵苦戰不息會日暮乃解甲面臺再拜慟哭士卒皆涕泣於是就執尋以憤慨卒

北魏

士孫天與扶風人以勲封莫西縣男武功太守

隋

蘇沙羅扶風人仕周釋褐都督後從韋孝寬破尉迥以功授開府儀同三司封通泰縣公開皇初冉彤羌作亂率兵擊破之後數載從史萬歲擊西爨累戰有功進位大將軍尋檢校益州總管長史會越雋人王奉舉兵作亂沙羅從段文振討平之卒於家

唐

重修鳳翔府志

卷之七 人物

二十三

李高遷岐州人客太原唐公引致左右執高君雅等有功以右三統軍從下霍邑圍長安力戰遷左武衛大將軍江夏郡公檢校西麟州刺史突厥寇馬邑高滿政請救詔高遷督兵助守後歷資州刺史卒

邱行恭郿人善騎射大業末與師利聚兵萬人保郿城人多依之羣盜不敢窺境後原州奴賊圍扶風行恭率五百人詣營斬之乃與師利迎秦王於渭北拜光祿大夫貞觀中從侯君集平高昌封天水郡公進右武侯將軍高宗立遷大將軍冀陝二州刺史致仕卒



諡曰襄初從討王世充太宗與諸騎相失惟行恭從賊騎追及流矢著太宗馬行恭回射之發無虛鏃賊不敢前遂下拔箭以已馬進太宗步執長刀大呼導之斬數人突陣而還貞觀中詔鑿石爲人馬象拔箭狀立昭陵闕前以旌武功云

賈師順岐人悉諾邏并兵攻城使早降師順不可賊數日又說師順曰明府不降吾衆且還宜有以贈我師順請脫士卒衣襦悉諾邏知無有乃夜撤營去毀瓜州師順開門收器械復完守備吐蕃果使精騎還襲

重修鳳翔府志

卷之七 人物

見有備乃去以功遷鄯州都督隴右節度使終左領軍將軍

馬璘扶風人讀漢馬援傳至丈夫當死邊野以馬革裹尸歸慨然曰使吾祖勲業墜地乎開元末以奇勞累遷金吾衛將軍至德初統精甲三千赴鳳翔肅宗委以東討初戰渭南以百騎破賊五千衆從李光弼攻洛陽史朝義衆十萬陣北邙山璘率部士五百薄賊屯出入三反賊遂潰吐蕃寇邊璘移軍援河西懷恩之叛璘間關轉鬪至鳳翔虜圍已合璘入縣門不解

甲出戰背城陣虜潰大歷八年吐蕃內寇璘設伏潘原與渾瑊合擊破之自檢校尚書右僕射進扶風郡王十一年卒於軍諡曰武

竇軌岐州人高祖起兵軌募兵千餘人迎謁長春宮帝大悅使畧地渭南下永豐倉收兵五千從平京師封贊皇縣公爲大丞相諮議叅軍賊掠宜春軌大破之赤排羌與薛舉將鍾俱讎寇漢中拜軌秦州總管討賊連戰有功餘黨悉降擊黨項吐谷渾於松州走其衆軌度羌必爲患始率兵屯田松州太宗立召授右

重修鳳翔府志

卷之七

人物

二十五

衛大將軍出爲洛州都督周洛間因隋亂人不土著軌下令諸縣有游手末作者按之由是威信大行民皆趨本卒贈并州都督

竇琮軌之弟時秦王方收攬英豪降禮接之與出入卧內從平西河破霍邑授金紫光祿大夫封扶風郡公從劉文靜擊屈突通於潼關敗其將桑顯和通遁去琮以輕騎追獲於稠桑進兵下陝縣拔太原倉遷左領軍大將軍將圖洛陽詔琮留守陝以護糧道王世充將羅士信數以兵鈔犯琮使人說降之東都平檢

校晉州總管從隱太子平劉黑闥以功封譙國公卒  
贈左衛大將軍諡曰敬

**元**

王穢虢縣人授都統從大將軍破紫荊關取涿鹿保州  
中山從南征下古北口攻薊雲順等州所過迎降入  
覲授銀青榮祿大夫時都城廟學燬於兵穢復立之  
春秋率諸生行釋菜禮從征西夏及秦州夏人撤橋  
梁軍不得前穢夜督士卒運木石成橋軍乃得進  
領省中都盜起掠近縣穢曰都城根本之地不可無

重修鳳翔府志

卷之七 人物

二十六

備引水環城人心稍安遣男守謙率軍討諸盜平之  
從征關中長驅入京兆進克鳳翔從攻汴京奉命持  
國書使宋宋甚禮之前後五往以和議未決隱憂而  
卒

**國朝**

張起和鳳翔人以行伍歷官興漢鎮標左營守備戢兵  
衛民修城築堤甚著勞績後調征貴州叛苗賊夜半  
劫大營起和率百餘人當賊萬衆力戰至午賊始退  
立擢思州遊擊旋進鎮遠叅將後陞雲南永昌協鎮

善撫御喜調恤所在軍民戴德

直諫

班伯成帝時爲侍中光祿大夫上嘗與張放等飲宴禁中皆引滿舉白時御坐屏風畫紂醉踞妲已作長夜之樂伯以久疾新起入見上指問之曰此圖何以示戒對曰沈湎於酒微子所以告去也式號式呼大雅所以流連也詩書淫亂之戒其原皆在於酒上乃喟然嘆曰吾久不見班生今日復聞讜言因左遷放等

重修鳳翔府志

卷之七

人物

二十七

何敞永元初竇憲兄弟驕恣敞上封事曰愛而不敬終至凶戾猶饑而食之以毒適所以害之也伏見大將軍憲兄弟專朝奢侈僭倂誅戮無罪臣敞區區誠不欲上令皇太后損文母之號陛下有誓泉之譏下使憲得保其福佑憲啣之出敞爲濟南王康大傅康最驕悍嘗有失敞輒諫諍康亦知敬重無嫌悟焉官至五官中郎將

韋彪章帝時詔議貢舉彪議曰國以簡賢爲務賢以孝行爲首求忠臣必於孝子之門然其要在於選二千

石二千石賢則貢舉皆得其人矣又上疏言天下樞要在於尚書間者多從郎官超升此位雖曉習文法類無大能宜鑒嗇夫捷給之對深思絳侯木訥之功帝皆納之官至司徒

申屠剛平帝時舉賢良方正對策論王氏專政罷歸建武七年徵拜侍御史遷尚書令帝嘗欲出遊剛諫不聽乃以首觸乘輿輪帝遂止數直諫忤旨出爲平陰令後徵拜大中大夫病免

郭欽隃廩人哀帝時爲丞相司直奏免豫州牧鮑宣京

重修鳳翔府志

卷之七

人物

二十八

兆尹薛修等又奏董賢左遷盧奴令平帝時遷南郡太守王莽時以病免官

朱勃扶風人馬援卒帝追收新息侯印綬賓客故人莫敢弔朱勃詣闕上書願下公卿平援功罪宜絕宜續以厭海內之望書奏報歸田里

鮑恢建武中司隸鮑永辟爲都官從事永常彈劾藩王恢亦抗直不畏疆禦帝曰貴戚且宜斂手以避二鮑

唐

馬彝扶風人以正直稱漢陽王張柬之有林園在州西

公府多假之游宴曹王臯將買之彝言曰漢陽有中  
興功遺業當百代保之王縱欲之奈何令其子孫自  
鬻焉臯謝曰主吏失詞爲足下羞微足下安得聞此  
言

王譜珪六世孫懿宗初爲右補闕時白敏中以墜陛傷  
腰三表辭位其人傾側無特操譜因疏論以爲陛下  
致理之初乃宰相盡心之日不可暫闕敏中卧病數  
月陛下雖與他相坐語未嘗三刻天下之事陛下嘗  
暇與之講論乎願聽敏中罷去延訪碩德以資聰明  
重修鳳翔府志

卷之七 人物

二十九

無使其有持寵曠官之譏帝怒乃貶譜陽翟令給事  
中鄭公輿封還勅書復令宰相議宰相以譜侵敏中  
竟貶之

**明**

李著郿縣人由太學生授廣西道御史當英廟北狩景  
帝以太后令監國時國勢危疑漸起卽眞之議著力  
言宜輔太子以成周公之美疏詞稱殿下言頗切直  
帝再三詰責終不屈帝怒殺之同邑岳嵩亦以太學  
生任兵科給事中以言事忤旨謫福建布政司經歷

虎臣麟遊人慷慨有氣節成化末貢八太學上疏極諫  
棕棚祭酒費閭懼其賈禍會六堂鳴鼓聲罪以銀錙  
鎖之俄官校至宣臣至左順門中官傳旨勞之曰爾  
言是棕棚拆卸矣吏部予七品官閭聞而大慚臣知  
雲南礮嘉縣事卒於官

宦績

漢

馬廖援之子以父任爲郎肅宗立爲衛尉不愛權勢盡  
心納忠時皇太后躬履節儉事從簡約廖慮美業難

重修鳳翔府志

卷之七

人物

三十

終上疏長樂宮以勸成德政畧曰昔元帝罷服官成  
帝御浣衣哀帝去樂府然而侈費不息至於衰亂者  
百姓從行不從言也夫改政移風必有其本傳曰吳  
王好劍客百姓多創瘢楚王好細腰宮中多餓死斯  
言如戲有切事實太后深納之朝廷大議輒以詢訪  
封順陽侯

馬嚴援兄子肅宗卽位拜侍御史中丞其冬有曰食之  
灾上書畧言宜勅正百司各責以事州郡所舉必得  
其人若不如言裁以法令帝納其言時京師訛言賊

從東方來諸郡違急各以狀聞嚴察其虛妄獨不爲  
備詔書責問嚴固執無賊後卒如言徵拜大中大夫  
遷將作大匠二弟敦亦知名當世官至虎賁中郎將  
馬續嚴子博觀群籍順帝時爲護羌校尉遷度遼將軍  
所在以威恩稱

馬棱援族孫肅宗時爲廣陵太守時穀貴民饑奏罷塩  
官以利百姓興復陂湖溉田二萬餘頃江湖多劇盜  
以棱爲丹陽太守棱發兵掩擊皆禽滅之轉會稽太  
守永初中卒於家

耿况更始時爲上谷太守遣子弇奉表詣長安遂歸光  
武五校賊二十餘萬北寇上谷况與子舒連擊破之  
光武卽位封况隃糜侯後復與舒攻彭寵寵死天子  
嘉况功使光祿大夫持節迎况賜甲第奉朝請及卒  
諡烈侯

耿國况子建武四年初入侍光武拜爲黃門侍郎應對  
左右帝以爲能父况卒國於次當嗣上疏以先侯愛  
少子霸固自陳讓有詔許焉呼韓單于款塞稱藩願  
扞禦北虜事下公卿議皆不可國獨以爲宜如孝宣



故事受之由是烏桓鮮卑保塞自守北虜遠遁中國  
少事後拜大司馬卒於官

孔奮扶風人王莽末避地河西爲竇融守姑臧雅持清  
節光武時單車就徵羌人德之斂器物若干追送數  
百里不受後遷武都太守賜爵關內侯

郭伋扶風人事世祖爲尚書令數納忠諫爭出守長山  
次守漁陽乘離亂之後養民訓兵開示威信盜賊銷  
散匈奴遠迹又守潁川并州皆有卓績年八十乞歸  
宋果扶風人以烈氣聞辟公府侍御史并州刺史所在

重修鳳翔府志

卷之七 人物

三十二

能化

蜀漢

法正郫人爲劉璋軍議校尉璋不能用別駕張松與正  
善度劉璋不足有爲因勸璋迎備璋問可爲使者松  
舉正行旣還與松密圖奉戴以爲州主及備定蜀傾  
心輔翼卒先主流涕累曰諡曰翼侯賜子爵關內侯  
奉軍都尉漢陽太守及先主正尊號大敗於吳還白  
帝城亮曰使孝直若在必能制主上東行就復東行  
必不傾危矣

魏

龐迪扶風人爲河南尹以清賢稱

晉

馬敦扶風人督守關中侯守隴州御羌有功

魯芝郿人累遷尚書郎轉天水太守曹爽輔政引爲司馬宣帝起兵誅爽芝斬關出勸爽挾天子保許昌爽不能用芝爽敗下獄當死宣帝赦而不誅除并州刺史以綏輯有方遷大鴻臚晉武踐祚轉鎮東將軍進爵爲侯卒諡曰貞

重修鳳翔府志

卷之七

人物

三十三

魯宗之郿人義熙元年值桓氏亂起宗之起義師攻襄陽襲其僞雍州刺史桓蔚走江陵復進屯紀南與劉道規共破桓謙未幾桓謙逼江陵復自襄陽率衆赴道規與之共滅桓氏進號平北將軍後劉裕將移晉祚密除異已者宗之乃與司馬休之結納共謀討裕宗之率其子竟陵太守軌赴江陵助休之屢敗劉裕之衆而徐湛之父逵之爲彭城內史劉康祖父度之爲江夏相並被殲焉及裕濟江督戰軌等敗奔襄陽裕復進軍克江陵遂父子奔秦頃病卒

□秦

竇滔扶風人符堅委以心膂之任備歷顯職皆有政聞  
遷秦州刺史忤旨調戍燉煌會堅寇晉襄陵慮有危  
逼藉滔才畧乃拜安南將軍留鎮襄陽

隋

蘇孝慈扶風人少沉謹有氣幹從武帝伐齊以功進位  
開府高祖受禪拜兵部尚書上於陝州置常平倉轉  
輸京師於是決渭水爲渠以屬河令孝慈督其役渠  
成上善之數歲進位大將軍先是以百官供費不足

重修鳳翔府志

卷之七 人物

三十四

臺省府寺咸置廨錢收息取給孝慈以爲官民爭利  
非興化之道上表請罷之開皇十八年出爲浙州刺  
史仁壽初遷洪州總管俱有惠政其後桂林山越相  
聚爲亂詔爲行軍總管擊平之卒於官

楊珣扶風人武部尚書

唐

邱和洛陽人徙居郿周隋間歷資梁蒲三州刺史以寬  
惠著名大業末海南苦吏侵數怨叛帝以和所吏淳  
良拜交趾太守撫接盡情荒境安之隋亡陳欵歸國

高祖令爲稷州刺史卒諡曰襄

竇威岐州人父熾在周爲上柱國入隋爲太傅太穆皇后其從兄弟女也威蜀王秀辟爲記室威以秀多不法謝疾去大業中累遷內史舍人數諫忤旨高祖入關召補大丞相府司錄叅軍方天下亂禮典湮缺威多識朝廷故事乃裁定制度帝語裴寂曰威今之叔孫通也授內史令每論政事得失必陳古爲諭後寢疾帝臨問及卒哭之慟贈同州刺史追封延安郡公諡曰清

重修鳳翔府志

卷之七

人物

三十五

竇抗威從兄子高祖定京師授將作大匠兼納言後從秦王平薛舉功第一又從征王世充東都平冊勲於廟者九人抗與從弟軌與焉卒贈司徒諡曰密

竇靜高祖時突厥數爲邊患糧道不屬表請屯田太原以省餽運歲收粟十萬斛太宗卽位突厥攜貳爲陳虜中虛實諸將由是大克獲部落皆內附再遷民部尚書卒諡曰肅

竇誕義寧初從秦王征薛累遷太常卿高祖諸子幼未出宮者十餘王國司家事皆誕主之貞觀中進華國

公爲宗正卿卒贈工部尚書荊州刺史諡曰安

竇璡抗弟隋大業末爲扶風太守歷民部尚書從秦王  
平薛仁泉時蜀盜賊多皆討平之武德中與太常少  
卿祖孝孫受詔定雅樂正鐘律卒贈禮部尚書諡曰  
安

竇德明威從孫王諒反時年十八募士五千號令嚴整  
倍道擊賊破之以功累擢齊王府屬高祖取長安諫  
隋將魏文昇陰世師無殺孝基神符道宗等以取怨  
長安平謁高祖拜考功郎中從秦王擊王世充封顯

重修鳳翔府志

卷之七

人物

三十六

武男歷常愛二州刺史卒

竇德元德明弟初進檢校左相勤職約已天子嘗臨朝  
咨其清素居位數年贊圖封禪事與李績皆爲使禮  
成進爵二級封鉅鹿男卒贈光祿大夫幽州都督諡  
曰恭

張知謩幽州人徙岐兄弟五人知元知晦知泰知默俱  
曉吏治清介有守武后稱其兄弟容而才詔工圖之  
謂之兩絕中宗在房州知謩供億保戴不少弛知泰  
終魏州刺史知謩以大理卿致仕伯仲同朝人以爲

榮

鄭延昌舉進士遷監察御史鄭畋鎮鳳翔表在其府黃  
巢亂京師畋倚延昌調兵食且諭慰諸軍擢司部員  
外

馬總系出扶風元和中以虔州刺史遷安南都護廉清  
不撓以儒術教其俗政事嘉美獠夷安之副裴度宣  
慰淮西吳元濟禽爲彰義節留後蔡習僞惡總爲設  
教令明賞罰磨治洗汰其俗一變擢淮西節度使入  
爲戶部尚書卒諡曰懿

重修鳳翔府志

卷之七

人物

三十七

野詩良輔鳳翔人爲將與史敬奉柳玭皆以名雄邊後  
爲隴州刺史朝廷遣使至吐蕃輒相謂唐家稱和好  
豈妄耶不爾安得任良輔爲隴州刺史

**宋**

閻詢天興人由進士第累遷鹽鐵判官使契丹頗諳北  
方疆理時契丹在靴淀迓者王惠導詢由松亭詢曰  
胡不逕葱嶺而迂枉若是豈非夸大國地廣以相欺  
耶惠慚不能對徙河東轉運使言三路士兵疲老者  
聽其旋以強壯者代從之知河中府大河漲壞浮橋

詢易爲長橋拜天章閣待制轉右諫議大夫知邠同  
二州提舉上清太平宮卒

張汝明鳳翔人神宗時爲漢陽軍判官時行公田法授  
牒按境躬臨閱實雖雨雪不渝由是吏不得通賄而  
稅均於一

**明**

李敬臣鳳翔人洪武中以材能卓異薦於朝歷官有聲  
累遷刑部右侍郎

楊瑞鳳翔人洪武間知墊江縣積穀二萬石市牛千隻

重修鳳翔府志

卷之七 人物

三十八

民無力者給之植道傍柳以休行者

康郁扶風人建文中任御史時議削奪燕藩上疏切諫  
不報歷官四川按察使持憲嚴明人不敢干以私 祀鄉賢

甄儀麟遊人歷順天府尹兵部左侍郎清白之操始終  
不渝及卒賜葬祭 祀鄉賢

艾瑛隴州人永樂中任浙江右布政才能著聞 祀鄉賢

霍瑄鳳翔人永樂中陞大同知府正統十四年英廟北  
狩也先擁衆奉車駕至城下守城者戒嚴不敢啟瑄奮  
不顧身從水竇匍匐出叩馬嗚咽進膳羞靴袍英廟

復辟召陞工部右侍郎賜二品服成化時以老致仕

卒  
祀鄉賢

許璞鳳翔人正統六年知仁和縣公平廉慎輕徭薄賦卒於官貧無以殮民爭賻葬爲木主於本縣祀之

胡貞扶風人知永和縣邑素荒殘貞至買牛種治耕具教民樹藝後擢知應州改廣德俱有循聲

何回郿縣人知祁門縣歷遷山西右叅議廉勤惠義始終不渝

王喬郿縣人宣德初同知蘇州府蘇賦甲他邑郡喬任

重修鳳翔府志

卷之七  
人物

三十九

期年逋負皆完累陞工部尚書京師城垣外甃內土雨久輒壞喬督理純甃之正統中以王振用事致仕成化三年廷臣舉文武大臣行能勞績請量賜贈蔭九四十八人而喬與焉  
祀鄉賢

楊茂寶雞人英宗朝歷官湖廣道監察御史彈劾不避權貴後出爲雲南廣南府知府時值南寇犯境茂先

賑饑而後討賊人樂爲死賊平詔進階三品  
祀鄉賢

何昇麟遊人由主事陞郎中以謹慎清著聞於朝  
祀鄉賢

李善岐山人由進士知黎城黜嚴峻尚寬平獎孝行勵



耕織遷知汾州民間有到底清之謠累擢四川叅政  
告歸

郭宗舜岐山人有膽畧正統時群盜聚劫宗舜以計擒  
之有司上其事授巡檢歲凶詔下求言宗舜伏闕上  
十事極論時弊指斥權要未復繫之以詩英廟採行  
再授溇縣巡檢會御史楊綱夜經其處宗舜盤詰如  
法綱怒劾以輕侮風憲宗舜亦抗章辨奏上直之及  
土木之變入塞省候進衣物後論功陞後軍都督僉  
事

重修鳳翔府志

卷之七 人物

四十

張文質扶風人知澤州輕徭薄賦舉廢釐弊擢漢陽知  
府任九載多惠政時權閹以文質同鄉里期一見卒  
不往遂罷歸

田濟麟遊人由進士擢御史按浙江抑豪右辨疑獄還  
朝遇事敢言有引裾折檻之風後出守眞定革吏弊  
察民隱時瘟疫作濟施藥給棺歲荒不待上報開倉  
賑濟全活無筭又挫戚畹之勢釋盜誣之冤境內大

治

子孔昭年二十成進士授大理評事  
老練平允不三年而卒時人惜之

楊祥寶雞人由四川重慶府通判陞夔州府同知廉介

有爲剛毅不阿人號爲青菜楊所至民皆立祠以祀  
之祀鄉賢

劉俊寶雞人由翰林院編修陞工部右侍郎才思敏捷  
入仕後學術益邃嘗於上前奏對便便商輅歎爲不  
及歷官四朝政聲懋著西廠汪直作奸弄權人莫敢  
發俊獨披陳其惡揭暴無遺一時有鐵扳劉之號祀鄉賢  
王政扶風人令蘭陽遷威縣摘奸剔蠹平賦均役多異  
政陞澤州同知再補遼州前後二十年清慎廉直始  
終不渝所蒞俱祀名宦

重修鳳翔府志

卷之七人物

四十一

胡恭扶風人由光祿署正歷陞正卿清刻自持夫人躬  
親紡績以給中使嘗啣命至索賂無狀恭怒解帶擊  
之去卽易服請罪上慰遣之

張恕汧陽人知山西平遙縣九年不寬不縱民戴其德  
陞汾州知州循聲一如平遙時

楊恭岐山人由進士歷官通政司右通政運河潰決奉  
命督理修築區畫勤劬一年遂底績成化末關中大  
饑親鄰赴任就食咸廩給之又遣人持俸金歸易粟  
以贍里之不能至者所活數百人

侯珠麟遊人由舉人知大名閭鄉二縣廉勤仁恕卒於

官百姓哀思

祀鄉賢

閻仲實隴州人由進士爲考功隨材量用鑒別精當公論倚以爲重遷河南副使歲凶人相食遍歷所部存

省賑貸全活甚衆

祀鄉賢

閻仲宇仲實弟由鹽山知縣累遷山東副使時有妖僧惑衆仲宇擒之實於法巡撫湖廣時洞庭襄漢間劇賊充斥苗蠻梗化仲宇先後設謀擒之陞兵部尚書仲宇資性端重敷奏明切爲政寬和不喜更張致仕

重修鳳翔府志

卷之七

人物

四十二

卒遣官祭葬

入鄉賢祀

張繼鳳翔人由戶部郎中出知順德府事存大體法平恕而人不冤歲旱引躬自責卽雨境內多渠地高水下製桔槔以濟教民植桑蠶事大興盜劫鉅鹿捕官誣服齊民十三人繼按得情釋之而獲眞盜人稱神明有戚里占民田辨者輒毆擊致死繼往勘斷歸民責戚悚息不敢動

林恭寶雞舉人由阜城知縣陞順德府治多惠澤民爲

之立遺愛祠後歷官叅政

祀鄉賢

甄希賢麟遊人儀孫由進士授御史出按河南雲南激濁揚清貪污落膽後遷知府未任卒朝野共惜其才張撫寶雞人由進士授刑部主事性剛決不畏強禦都督王義劉寧廣寧侯劉銓山西鎮守太監石巖各有罪衆莫敢決撫立訊決之浙江副使張蕙罪惡彰聞使者莫敢言撫劾之服罪進四川按察副使蜀大饑捐俸賑濟民賴不孳陞湖廣按察使楚多積盜出俸金募捕之盜由是息尋晉刑部侍郎明年乞歸祀鄉賢李善隴州人由行人擢御史上疏極言太監梁芳怙寵

市權中貴側目按遼東韋太監聞其至不敢縱舍人侵漁軍餉又劾都督王鎧孫貴皆以不職罷壽寧侯張鶴齡喉子漁獵小民善曰此教授侯門者弗嚴也乃叅其教授姚某侯家以罪發戍者若干人遠邇皆縮舌侯陰問之出爲河南僉事河決張秋善爲相度水勢開賈魯河改河南注塞黃陵決口斷水東流陞湖廣叅議何淮等僭號攻陷城池善以計擒之荆襄王景陽以左道惑衆善捕送京師餘悉不問擢四川布政使番人久肆標掠善移檄宣布朝廷威德番盡

降拜南京右副都御史以整肅風憲爲已任陞南京工部尚書移疾歸卒賜祭葬

祀鄉賢

李俊岐山人官吏科都給事中彈擊奸回權要斂迹出爲湖廣叅議轉山西叅政俱有德政及人致仕歸囊

橐蕭索自視囂然

祀鄉賢

閻价隴州人由庶吉士授浙江道御史查盤松茂邊儲巡按河南劉瑾亂政价特疏劾之後陞四川叅議致

仕卒

祀鄉賢

宋德岐山人擢浙江道御史外遷四川副使剛明果斷

重修鳳翔府志

卷之七 人物

四十四

清介不渝定溫鞏之田洗焚死之冤靖王剛之亂宦績尤著

曹希夔岐山人任西安府訓導學業深醇素勵風節以

德造人多所成就

祀鄉賢

王世安寶雞人知澠池縣多惠政及歸紳庶乞留不得

建祠立石以紀其績

祀鄉賢

胡宗道由進士授主事歷襄陽眞定知府陞四川布政使轉給軍儲平定寇亂兩蒙褒賚擢應天府尹清慎

著名及卒欽賜祭葬

祀鄉賢

白鸞寶雞人由行人擢浙江道御史嘗於上前彈寧化  
王事廷臣爲之膽寒而上卒可其奏出按山西舉滯  
抑橫伸理冤鬱所至凜其嚴明

祀鄉賢

李璽鳳翔人由荊州府推官擢監察御史出按河南山  
東直隸時劉瑾用事璽一切無所假貸由是忤瑾逮  
獄降爲平溪縣丞超拜河南副使折獄聽政嚴恕並  
行進職按察使家徒壁立嘗赴襄陽過洞庭群盜操  
刃入舟見其行李蕭然相與嗟歎羅拜而去

孟醇岐山人由知縣擢御史時劉瑾黨人魏斌亂鹽法

重修鳳翔府志

卷之七

人物

四十五

醇以成憲折服之陞城都知府駱胡盜起殄其渠魁  
餘黨悉解散歷官叅政以內艱歸遂不復出

王綸扶風人任眞定知縣適權璫奉使辱官吏笞郵卒  
至眞定綸直入傳舍縛其左右搜簡囊橐欲聞於朝  
璫謝罪乃已尋入爲御史出按四川前璫適爲鎮守  
歛戢不敢稍恣時藍鄙作亂督臣洪鐘日事宴飲露  
章劾罷之後掌十二團營會逆璫劉瑾啣靈寶許進  
誣以事捏旨命綸往按治綸力爲昭雪瑾怒方遣逮  
而瑾敗由此直聲震中外擢浙江叅政

楊武岐山人由進士知淄川縣鋤惡理冤積粟賑貧勸耕課讀疏河灌田利賴甚溥拜御史按河南順天諸郡縣時劉瑾用事臺使不舉其職武通下情宣上德毫無顧避擢大理寺左寺丞勘視邊務彈劾屯田不均軍役耗損諸弊政超拜左僉都御史巡撫宣府罷歸

王億鳳翔人由進士授闕鄉令邑素衝罷宦寺往來擾民億力爲裁抑陞山東僉事分巡遼東皆以清直著尋督餉京師太監張忠弟舉素驕縱攬解河南歲餉

重修鳳翔府志

卷之七

人物

四十六

侵沒至數萬官吏莫敢誰何億發其奸狀杖之服罪岳宗郿人除密縣令治尚寬和職滿當遷民詣闕乞留不得爲圖像留冠履寄思焉

畢鸞鳳翔人知朔州勸農桑興學校陞南京戶部郎中轉工部提督漕河創平水閘涵水洞民利灌溉出知大理府姦豪斂迹革心郡中大治

楊汝宮寶雞人任府判禁豪猾清糧政同知臨江府馭兵民有方土著新附各使安輯終楚府長史

祀鄉賢

吳縉鳳翔人由戶部主事陞兵部郎中以戇直外遷歷

銅仁處州廬州等處知府累陞山東按察使居官簡靜在廬治績尤著廬人祀於名宦

閻欽隴州人由進士選吏科給事中嘗抗疏勸毅皇視朝同列彈劾諸疏多出其手封駁不避權貴遷河南兵備推演武侯八陣圖爲九曲新書以訓戰士募義勇修城塹謹烽堠遠近恃以爲安勢豪張輔殺其妾及妾母妾母之族訟諸官輔反誣以他事陷獄死欽廉其狀執輔抵死信陽民爭田里中惡少兩殺之而誑其守謂自相殺欽按得其情斬之以徇又出奇計

重修鳳翔府志

卷之七

人物

四十七

執汝寧大盜劉學恒論死其黨自散遠近駭服

張經汧陽人任山西石州牧設計擒追土寇賊渠授首餘黨悉平及歸行篋蕭條士民爭贖堅卻不受

李苾岐山人以貢授邵陽教諭先行誼而後文學眞儒

多出其門

祀鄉賢

宋承殷鳳翔人授沔縣教諭整齊諸生陞通山令薄賦省刑邑人兄弟爭產諭以大義竟相推讓凶豪斂法捕實於理惡風遂化

徐衡岐山人由舉人知高唐州齊魯大饑捐俸出賑知



應州值邊警守禦有方迄完其城

祀鄉賢

胡昉扶風舉人任開封通判才具明敏能發摘姦伏有妖僧幻形以行污穢立剖其奸遷松江見婦人哭於江上而不哀密察之乃繼妻潛隕前室子而詐哭也  
卽逮訊正法

周易鳳翔人由進士授鹽城令海水漂沒田舍易出俸賑之攝山陽事大吏檄以濬河易以河水消長有時濬之徒耗民財力懇請得罷知四川叙州府橫江蠻叛當道欲發兵往勦易獨議撫循蠻果款服全蜀無

重修鳳翔府志

卷之七 人物

四十八

警

孫代扶風人由進士除行人使周肅兩藩饋遺一無所受擢御史糾吏部郎某僞學文奸削其籍穆廟視牲南郊戎服乘馬以出具疏爭之上怒卒是其所請出按四川平九絲都蠻督學江右掄拔皆知名士轉浙江叅政謝病歸

程緒鳳翔進士山西洪同知縣秉性忠厚居心廉慈督糧古滇有功陞戶部主事持正忤權貴中以他事免歸

高遷寶雞人才氣豪邁淹貫經史任長子訓導陞景州學正終肅府教授以正學爲訓人欽其風節事業詳長子景州名宦志祀鄉賢

王乾元寶雞舉人由順義令陞知朔州嚴什伍築堡垣敵至以有備引去遷濟南府同知先後攝篆九十數州縣而清謹之操始終如一

袁應春鳳翔人授靈石令以廉能調劇歷平遙崞縣夏縣太監張忠啣命開礦作威福令長皆長跪白事應春獨抗禮曰太監雖貴內侍也縣令雖卑外臣也無

重修鳳翔府志

卷之七人物

庭叅理忠怒劾之曰袁令素有能聲無如性傲何遂左遷永寧衛經歷移疾家居二十年臺省交薦起官歷員外郎卒

張瑗岐山人知沙河縣居官值北虜犯畿內勤築鑿簡兵馬備芻糗越四月事皆修舉境內以寧

高數仍寶雞人由孝義知縣陞四川夔州府知府居官

清肅務持大體祀鄉賢

李甲寶雞人由進士知開州清謹多惠政開民立祠以祀累擢大同兵備副使時值兵變甲冒刃慰諭鎮依

爲安轉餉餘羨金數萬悉輸之帑陞冀北右叅議以

母老乞養歸

祀鄉賢

孫崇先扶風舉人由蒙城知縣陞知潁州剔弊懲猾人

莫敢欺嘗於蛙止處掘伏屍知有隱寃禱於神而得

兇手名馬上英者執訊之立服衆咸驚異擢貴陽知

府

羣蛙遮道崇先禱於城隍是夕夢一馬負纓入門因得兇手馬上英

程雲翼鳳翔人初知四川達州再補直隸翌州清廉仁

慈民戴其惠累陞山東鹽運使丁母憂歸闖逆之亂

屠毒縉紳獨高雲翼素行不加害

重修鳳翔府志

卷之七 人物

五十

田有年扶風舉人歷滎河徐溝祁縣知縣有異政再遷

知江寧縣時魏璫遣內守備至留都橫甚有年力抗

之幾陷不測齊庶人與妖僧瑞光謀逆有年覺察遂

定其變擢戶部主事陞袁州知府值五溪洞蠻叛奉

檄帥師定之

高射斗寶雞人知東流縣設法捕盜嚴禁土豪遷山西

大同府丞時邊兵反仄慷慨諭以禍福咸稽首歸命

擢知貴州楚雄別駕土司煽衆作亂射斗選師練卒

不三旬而平

党修吉扶風舉人由國子助教歷戶部郎中監通州倉  
盈餘歲有萬石不以入家擢知龍安府有惠政民立  
祠以祀蕃夷亦來瞻拜云

郝士膏郿縣人由芮城令擢禮部主事歷吏禮兵三科  
給事中直言敢諫數上封事以忤魏璫謫降後累陞  
河南巡撫廉明嚴峻官吏肅然

何廷琦麟遊人嘉靖中以明經令山西大寧縣治盜不  
窮以法爲之買牛備種開誠誠諭遂皆感激爲良有  
富民嫌貧欲昧婚廷琦斷歸之而更捐俸以完其家

重修鳳翔府志

卷之七 人物

五十一

室致仕歸以行誼著里黨請入鄉賢祠

梁建廷岐山人由進士官大理寺寺正多所平反出守  
河南廉明仁恕請旨賜程邵二賢裔爲博士俾供祭  
祀歷川南兵巡道引疾歸值流賊猖獗養義兵以保  
護岐城土人立祠以報

曹暹岐山人由進士令猗氏擢御史巡按江淮振厲風  
采肅清僚吏尋叅議晉寧平晉藩之亂釋久沉之寃  
及告歸寇攻岐城出壯丁以搏賊賊潰城賴以全

吳峻鳳翔舉人由教諭擢山東館陶知縣更陞直隸趙

州知州端敏仁明所在建祠立碑

羅錦齡岐山人任資縣訓導端嚴質直訓迪有方入資縣名宦祠

張國治岐山人除獲嘉令撫字子遺周咨民瘼時連歲荒祲國治力請捐賑語甚切直遂忤上官意卽日罷歸論者皆以爲榮

王秉鑑扶風人由進士知郾城治行爲中州第一調光山郾人叩閭乞留兩地勒碑紀績擢工部主事以守門濬河諸功加級賜賚陞鎮江守民有止飲江心水

重修鳳翔府志

卷之七 人物

五十二

之謠歷官浙江叅政致仕

袁楷鳳翔人應泰殉難遼城楷時年十八痛父冤徒跣走京師上遺疏求白因得賜祭葬蔭諡天啟乙丑第進士初任南京禮部主事陞員外轉開封知府廉毅有大畧郡號繁劇案苦沉積楷一時並聽剖決無枉人稱爲照天燭後累陞四川川東道未赴歸

國朝陝西總督孟喬芳屢欲疏薦以疾辭

王聚奎郿縣人由行人擢貴州道御史錚錚有直聲以言事謫晉藩幕秦大饑請發帑賑恤未得報自出粟

以濟全活甚衆後累陞湖廣巡撫

劉承纓麟遊人出進士任荊州推官值容桑構亂寇荆襄承纓調集士兵布授方畧擒馘千餘人會以察典當遷督撫暨惠藩交章乞留既得請益以疆場自任累立捷功尋以勤勞致疾卒

王嘉榮鳳翔人令直隸新樂有惠政擢薊州牧權璫噉當道陷之士民爲叩閭訟枉調河南裕州牧時流賊聚宛下嘉榮繕城礪器鼓衆效死因獻戰守安民十二冊不報遂掛冠歸

重修鳳翔府志

卷之七

人物

五十三

高翔漢寶雞舉人任內邱令崇政十一年流寇犯境翔漢偕子光暉光曄天錫及家人王達子登城拒守夜出壯士多持鼓炬伏於城西寇來薄城城中火起伏從後出鼓聲震地寇疑外援至且亂翔漢率光曄等開門躡之多所俘馘寇退上嘉其能擢工科給事中三子皆授正千戶官北直大饑漕運不繼翔漢以水涸大舟難進更製飛艇以達京師賴以賑給陞都給事中嘗言事語侵中宮本留不發上問翔漢數日何無本奏翔漢免冠謝曰臣觸冒不測故靜以待罪上

曰后誠怒甚賴朕調解汝司諫無罪也

朱廷燎鳳翔人授蒼梧令值大軍南征居民不寧多方  
安集成感誦焉

韓焯寶雞人任順義知縣時當新破尸橫民竄焯恤死  
弔孤招集流移數年比戶樂業以治行第一尋陞知  
府進汝南兵備道勅令勒兵恢復焯受命簡募得兵  
千餘率以徇地遇僞官卽斬不數月恢復十六州縣  
又以全省失陷兵力寡弱不足當賊上書請選將亟  
勦並自劾求罷帝獎其忠勇不允引退甲申之變北

重修鳳翔府志

卷之七 人物

五十四

向慟哭投印綬於公府抱憤而歸

王位鳳翔人除滿城教諭歲饑學使者按臨至部諸生  
就食他鄉不獲與試使者欲除其名位爲委曲求全  
且並代各邑陳請使者允其樸誠令山西夏縣值流  
寇攻城力不能支引刀自裁爲吏役救免賊逼受爵誓  
死不屈夏民在賊中者群以民之父母相泣訴於賊  
丐勿傷害遂以夏民脫歸

國朝

党崇雅寶雞人明末累官戶部左侍郎國初以原官補

用尋拜大學士當鼎新之際府藏空虛軍興旁午崇  
雅度支轉運軍儲不匱更定

大清律斟酌得宜蓋其相業亦有足觀

孫鵬鳳翔人崇政辛未進士知東明縣廉明有幹畧時  
萑苻多警鵬單騎至其穴諭以威福盜渠感泣就撫  
葺屋以寧

本朝順治初起知上海縣

高嶙寶雞人任浙江慶元知縣時經兵燹後滿目邱墟  
嶙次第經營諸廢具舉清釐糧畝胥吏向多舞弊侵

重修鳳翔府志

卷之七

人物

五十五

漁嶙置實徵冊逐戶詳載俾吏無作奸又善強記默  
識故所訊立決

馬翰如隴州舉人授蒲州牧勞心撫字以德化民蒲於  
正賦外歲徵退灘租四千餘石翰如力爲中免蒲困  
遂蘇以卓薦擢戶部員外進秩本部郎中

強致中寶雞舉人順治間任懷柔知縣以經術導民邑  
有絃誦聲行取戶部主事陞本部員外尋轉刑部郎  
中有節婦馮氏坐誣入獄致中廉其枉力爲辨雪出  
知江西吉安府合郡有神君之目及歸士民攀轅不



忍離去

程上瑞鳳翔人以拔貢授武清令

聖祖西巡道由武清顧橋梁道路修整民生富庶

召見褒之曰縣令眞可謂父母斯民者也

賜以宴後陞戶部主事以奎誤歸

党居易以祖崇雅蔭任湖北均州知州時當流寇蹂躪之餘居易招徠撫字流移漸復吳逆黨譚楊諸賊突逼城下居易出私財募敢死士率以固守會援兵至乃解叙功陞屯田員外郎繼陞江南司郎中轉廣東

重修鳳翔府志

卷之七 人物

五十六

南雄府知府飭屬員除火耗設義學濬築陂堰八十餘里灌田萬餘頃尋陞廣東按察司副使分巡雷瓊道

劉崙麟遊人授貴州新貴令決疑獄絕苞苴上憲雅重之稱爲廉能吏轉東城兵馬司副指揮

高維岳寶雞人授鹽運司經歷大吏器重之陞授北直欒城知縣課農桑興學校繕城垣廩貧乏民不忘之馬開泰寶雞舉人授山東章邱令疊遭水旱蝗蝻請賑得報卽親督散給民沾實惠修文廟建義學親爲講

課邑之文教漸興行取刑部主事以詳慎著聞

劉自唐鳳翔進士任雲南祿豐令祿素瘠貧自唐勸民  
通渠引水灌田由是漸成沃壤祿又鄙陋自唐捐俸  
建學親與講貫由是漸起文風辛卯入闈分校拔士  
皆得殊尤一時服其衡鑒補文選司主事轉湖南保  
靖同知繼調永順府掌印同知入深谷勸諭諸苗結  
以恩信及歸苗民立碑以誌惠

強兆統寶雞人由進士任廣東電白令剪惡鋤強毫不  
寬貸有豪猾倚上官作弊虐民兆統稟於上憲逮寘

重修鳳翔府志

卷之七 人物

五十七

於法由是刁風頓息行取吏部主事累陞郎中典試

江南

鄭王選鳳翔人由舉人授四川夔州府奉節縣知縣折  
獄明斷案無積牘捐造救生船及致仕民爲立碑以  
誌遺愛

張良窠鳳翔人任畧陽司訓勤於課士諸生感其就將  
文風爲之大振

孝友

漢

馬光援三子喪母過哀帝以是特親愛之

**南齊**

魯康祚扶風人有至性母患乳癰醫療不愈康祚乃跪捧癰大哭母卽覺小寬因此漸差

**唐**

楊哲鳳翔天興人以孝行稱

楊播哲子舉進士元宗召拜諫議大夫棄官歸養子炎亦以孝聞

王燾郿人性至孝母有病屢求名醫以治之母卒廬墓

**重修鳳翔府志**

卷之七 人物

五十八

**元**

楊皞扶風人母病叩天求代如是者再母失明登太白山取神泉水洗之遂如故

趙榮扶風人母有疾割股肉啖之者三復負母登太白山禱於神得聖水飲之乃痊

**明**

梁準鳳翔舉人任石州學正聞母喪卽曰徒跣抵家結廬塋域朝夕哭奠墓傍植樹僅三尺鵲巢其上育雛時禮科給事中胡濙奉使聞其事造塋慰問還奏於

朝詔授湖廣鈞州知州兼表其閭

祀忠孝祠

梁鑣府庠生父母歿廬墓積六載號泣如初喪嘉靖間  
詔錫冠帶告祀邱隴

石玫鳳翔人奉孀母定省不怠爲松江華亭令母喪歸  
哀毀骨立廬墓三年有司請旌其門

祀鄉賢祠

馮胤鳳翔人郡守扈遲以經明行修薦於朝詔下趨之  
行適母疾侍湯藥衣不解帶者四十餘日及免喪有  
司復起之胤曰捧檄而行爲親也親已歿復何求乎

遂不仕

祀鄉賢祠

重修鳳翔府志

卷之七 人物

五十九

程其能鳳翔舉人事二親孝養備至及卒哀毀逾禮

陳舜道鳳翔庠生性至孝母病嘗穢府縣舉孝行三院

俱表其閭

賈文鳳翔人性孝友親亡敬兄如父撫姪如子教之入  
庠

賈一元文子事繼母孝待堂弟有恩

王玳鳳翔庠生事繼母孝養備至兩舉賓飲

杜孟春鳳翔人性至孝老而彌篤督學姜贈以金幣旌

表其門

劉鳳岐岐山人父母早亡事祖母李氏曲盡孝道李歿廬於墓側一夕夢李運水來家次日比鄰失火至岐舍反風火息人以爲孝感

陳倫岐山人年十七父官顯上疾亟禱以身代及卒扶柩徒步歸里足指破爛不一乘騎

劉厚岐山庠生祖母楊氏病篤厚割臂肉十嚙啖之病旋愈祖患疔疽須人血調傅厚噬指血塗之疽亦卽差

楊楠岐山舉人父兄早喪事孀母寡嫂曲盡孝敬母病

重修鳳翔府志

卷之七 人物

六十

卒跌號惻怛勺水不入口月餘竟殂

宋仲貴岐山庠生父歿廬墓三年有馴雉之異

武全岐山人事後母得其懽心兄弟中有拂母意者卽跪謝達且母知而悅始罷跪兄弟皆孝讓相成

杜林封奎 王國翰以上岐山人俱廬墓三年

楊孝誠 龐宗文 張邦猷 王德玉 藺愛

李諷 李存 李茂林 張明盛 李守倉

以上岐山人咸以孝稱

李郁寶雞庠生性純篤卍角知事母母疾湯藥先嘗衣

不解帶歲歉家貧百里外負米以養閭里稱爲孝童  
李桂芳寶雞人十餘歲時家貧傭作以養親父卒竭力  
營葬曰哭於墓所歸則爲位哭於家一日聞母言父  
有畫像遠寄遂走數百里得而事之母卒不能備禮  
後稍有餘積卽營域合葬臺院交表其行

方世恩寶雞人母多病迎醫侍養不遺餘力時物奉親  
而後入口母喪三日不食寢苦三年寒暑幾忘

趙一元 劉守仁 趙 演 楊 崙

以上寶雞人俱廬墓三年

重修鳳翔府志

卷之七

人物

六十一

高 敏 楊孚光 韓惟賢

以上寶雞人咸以孝稱

張繼昌寶雞庠生孝友性成親病湯藥躬嘗親歿葬祭盡  
禮撫弟妹曲盡恩分每推產予之

田良祿寶雞人兄弟同居五十年曲盡友愛訓子姪以義  
方兄歿哀慟不食尋卒

張素知寶雞人三歲失怙母苦志撫之比長勤耕色養  
請表建坊不以家貧稍怠母病晨夕泣禱衣不解帶

楊倣程寶雞庠生父歿七日不食

王合扶風貢生母孟氏持家嚴重合與妻楊氏曲得歡心後官長寧訓導同邑孫代方按西川合陳請終養孫曰吾方薦君且勿言去合曰吾母老矣他人不知公寧未之知耶投牒而出卽日旋里

王衡扶風舉人居母喪廬墓三年

馬士碩扶風人事繼母如生母母病夫婦侍湯藥經年衣不解帶其母歎曰雖予親子不如母年九十餘士碩亦七十餘色養愈隆

王守庫扶風人少孤與弟守德事母至孝流寇亂人皆

重修鳳翔府志

卷之七

人物

六十二

避匿兄弟以母老不去俱被執寇欲殺守庫守德跪泣曰我有子兄尚無後且善事母願以身代守庫曰願殺我勿殺弟弟在母不缺養姪不失怙兄弟爭死不已寇俱殺之同執而逸者述其事以聞

胡宗顏扶風人母病危晝夜焚香叩天願以身代病尋愈人以爲純孝所感

王瀚郿縣庠生父早卒母病篤割臂肉以進母食而愈高彥良郿縣人性純孝二親繼歿廬墓六年

張維郿縣庠生父喪哀毀水漿不入口親朋勸以母在

痛哭進粥終喪焉友于諸弟一錢不私人稱其難  
田濟麟遊庠生繼母疾禱於天願減年益母果愈人以  
爲孝感

何廷琦麟遊貢生父早歿事母孝色養曲盡廬墓三年  
何桐麟遊人隆德教諭性仁孝親病嘗糞禱神求代親  
歿哀毀倚廬三年

謝討麟遊人事親孝廬墓三年果蔬不食

何元秀麟遊庠生與弟毓秀共相捐生脫父於難

趙應璧麟遊庠生隨母避賊母爲賊逼墜崖壁號泣哀

重修鳳翔府志

卷之七

人物

六十三

踊亦隨母投崖死

楊四謙麟遊貢生流寇之亂賊執其父欲殺之四謙求  
代父死弟四可又求代兄死相爭不已賊憐而俱釋  
趙德弘麟遊人寇縛其弟道弘索金帛不獲將殺之德  
弘哀請曰我有子道弘未舉嗣願代弟死賊釋其弟  
而殺之

王如愚汧陽庠生父歿哀送盡禮既葬廬墓三年妻李  
氏亦克盡孝道

王用臣汧陽貢生事親克孝親歿廬墓三年墓傍白鶴



迴翔郡縣表其閭

魏守寧汧陽人父亡事母甘旨必備母疾侍不離側每夜半焚香禱斗一夕夢人持肉以示比醒母忽問何處肉香守寧徵前所夢急割股進之果愈

田明錫汧陽庠生流寇入境負母逃被執脅之從亂錫泣告母老失明賊搥傷其母錫力護不得遂遇害

王傑汧陽人父病久醫藥不效割股肉啖之即愈

翟孜隴州人父卒廬墓築墳晝夜不輟一夕夢神告曰有賊不可出孜不信至半途果遇賊賊亦不加害及

重修鳳翔府志

卷之七 人物

六十四

母病亟索衣篋笥而失其匙即以頭撞鑰鑰自開母卒復廬墓三年

董舜鳳隴州人割股療親終身廬墓

吳顯春隴州人親終廬墓四遇虎而志不變

杜孟春隴州人事節母承顏盡志臺院交旌之

國朝

程希舜鳳翔人少失父時物不先母食鄰有異饌必懷歸奉母母疾湯藥必嘗以進賀逆之變負母避亂途遇賊泣請曰寧殺我勿傷吾苦節母也賊並釋之

李陽長鳳翔庠生父歿泣血不飲食者三日親黨勸勉始稍進粥葬祭如禮

王大利鳳翔人艱於甘旨赴蜀商販及歸而母逝哀慟不已及葬推產與兄而躬自廬墓

盧黠鳳翔人孝事繼母嘗於涇陽得佳桃一日馳歸獻之友愛其兄衣食不私季弟外病馳省之道亦病力疾而往四世同居內外無間言

孟兆慶鳳翔國學生少失父母事度母盡禮從姪幼孤撫如已子給以千金使自立焉

重修鳳翔府志

卷之七 人物

六十五

張繡宗鳳翔人從兄繡藻患時疫宗省視湯藥百方調理及卒爲具棺斂藻子迪甫十二歲收而撫之延師課讀爲之完娶後宗乏嗣迪事之如生父

李廷桂鳳翔人黽勉菽水能得親歡親歿撫二弟曲盡友愛一財不私

蹇逢吉岐山人父爲賊擄入南山奔救賊怒云有金贖去無金則殺逢吉多方給賊賊放父回吉竟死賊手邑令王以殉孝竒芳表之

侯秉璧岐山人家貧克孝母病涕泣禱代湯藥親嘗而

後進及卒棺殮不具傭賃於人計值先支以辦乾隆二十二年奉

旨旌表

雒兼善岐山人事親盡孝親雖微疾侍奉湯藥朝夕不離乾隆二十六年奉

旨旌表

龐行 王九成 王九圍 梁選廷

以上岐山人俱以孝稱

王可久寶雞人繼母張病日夕泣禱割臂肉和藥以進

重修鳳翔府志

卷之七

人物

六十六

病尋愈邑令何旌之

張繼昌寶雞人以孝友稱

潘繼昌寶雞人父被寇擄逕入賊營乞以身代賊義釋

之兄爲怨家誣陷力爲拯救事卒得雪後卒妻楊氏

守節奉姑人稱夫婦俱孝

張式仲寶雞舉人父早卒事兄如父母歿七日不食人

或言及父母卽愁然悲不自勝

董成梅寶雞監生事親養志居喪尤哀侍兄疾湯藥親

嘗歷久不懈族叔歿旅舍扶櫬歸葬族弟乏嗣代爲

置妾

李丹衷寶雞貢生事親純孝御史施扁其門曰孝行攸隆

王大烈寶雞人年十三而母卒負薪以養父後家稍裕父好施與輒先意承之父臨終顧諸子曰願子孫皆如大烈家斯昌矣

董永清寶雞監生事繼母叔母俱得歡心撫弱弟極加愛憐門內大小相觀而善閭里稱之

史紀祥寶雞人家貧營什一以奉親父患癱遂不外商

重修鳳翔府志

卷之七 人物

六十七

侍側三載父疾篤悲號泣血而卒

張繼聲寶雞庠生事繼母齊氏三十餘年誠敬無間齊亦撫如已出邑令劉表其門曰品行可風

王纘志寶雞庠生父卧病衣不解帶嘗其糞覺味苦色喜父病果愈

王體乾寶雞庠生父卒哀毀其叔又卒哭之慟雙睛突出家人以冷水送之始平竟以積憂死

沈昭寶雞武生母足患頑瘡每暑月輒痛楚昭以口吮其膿血痛少止歲以爲常畧無難色

容爾質寶雞庠生家貧事親甘旨必備親歿哀毀骨立  
楊紹襄寶雞庠生少孤貧事母撫弟妹備極艱苦以硯  
田所獲葬三世八柩嫁堂從孤女四人

閔克鑑寶雞貢生有至性事父及繼母年至五十孺慕  
不怠

車彤輿寶雞人日耕夜讀朝夕承歡

張燮寶雞人年十四母病割股肉以啖母

張鍾英寶雞人以遺腹子遵母訓每外出載父主隨時  
祭奠涕泣交頤

重修鳳翔府志

卷之七 人物

六十八

張宸聲寶雞庠生讓分屋於其兄

張敬修寶雞庠生甘貧好學善體親心久而不懈

張宏德寶雞人五世同居

張秉誠寶雞庠生九世同居

袁扶鼎 孔伯江寶雞人俱六世同居

張鑑郿縣庠生事繼母如生母家貧敬養不懈撫庶弟  
及孤姪恩誼尤篤

張福郿縣人家奇窮力田養親母失明每膳必親不以  
急遽廢

趙玉堂麟遊舉人父病嘗穢驗疾禱以身代

公孫浩麟遊庠生母疾篤割股和藥以進母病遂瘳

劉元昌麟遊庠生痛父被流寇拷掠死哀毀終身事繼

母尤盡子道

劉江麟遊貢生色養娛親不求仕進親歿哀毀鬚髮俱

白

呂夢熊麟遊庠生母老失明每早盥洗爲母舐目飲食

手供起居不離母壽八十八奉養無怠

何文元麟遊人父歿母疾篤感異夢起禱土主廟燃一

重修鳳翔府志

卷之七 人物

六十九

指和指灰入藥以進母病旋瘥更善事祖父母

魏棻麟遊貢生母歿勺水不入口者五日父歿哀毀尤

甚比葬河溢水凍喪不得渡跪冰上仰天號泣因感

疾數月而卒

趙岑翰汧陽恩貢生親歿廬墓三年有寇數十騎過其

居群相戒曰此孝子廬勿驚之遂從下道去

楊柱汧陽人三歲失恃繼母虐使之而柱益孝母爲之

易一衣一履必衣冠以拜遇時物不敢先嘗繼母亦

尋感悟

劉寵鳳翔人父歿事祖母李承顏順志歲饑李戚某欲就食漢南李有憂色寵卽懇留供其衣食李心大慰郭肯堂隴州庠生事父母以孝聞母癱患三年不起晝夜侍側屢嘗糞之甘苦以探疾之淺深及歿寢苦枕塊者三年

儒林

**漢**

李育扶風人沉思專精博覽書傳嘗讀左氏傳謂不得聖人深意作難左氏義四十一事建初四年詔與諸儒論五經於白虎觀育以公羊義難賈逵往返皆有理證最爲通儒

重修鳳翔府志

卷之七 人物

七十

**宋**

張戢任道力行每若不及兄載嘗語人曰吾弟德性之美吾有所不如其不自假而勇於不屈在孔門之列宜與子夏後先董傳鳳翔進士酣嗜讀書蘇東坡稱其文字蕭然有出塵之姿至詩與楚辭則求之於世可與傳比者不過數人

明

袁餉鳳翔人布衣好學往來應春應泰二子宦邸厲以清節應泰轉南直淮徐監司齎新茗襲衣爲壽翁怒封還曰汝從宦邸遺我物祇重吾羞耳後以經畧盡節遼陽翁曰吾固教之天地正氣固在吾家

張傑鳳翔人穎悟過人聖賢自期最愛涵養須用敬進學在致知二語因大書揭座右造詣日深或勸之著書曰吾年未艾猶可進也俟有所得爲之未晚

張舜典鳳翔人潛心理學與諸生朝夕講論皆朱程語

重修鳳翔府志

卷之七 人物

七十一

錄不以舉業爲先

馮侃扶風人學贍行修士類欽服何大復請徵修大學衍義補與孫東谷先生共講理學關中縉紳罔不推重

蕭良貴郿人操行正直篤學不倦日與後進列坐考課兼相勉以占道里人敬仰

國朝

李栢郿縣人貫穿百家勃窣理窟與朝邑李楷富平李因篤齊名稱關中三李



李修寶雞人精研理學剖析微奧嘗自砥礪其志不作  
杏壇中人不止

文苑

漢

士孫瑞扶風人少而好學博達群書遷大司農爲國三  
老子萌亦有才學與王粲善有詩在粲集中

魯丕扶風人性深沉好學兼通五經舉賢良方正

馬融扶風人才高博洽爲世通儒涿郡盧植北海鄭玄  
皆其徒也

重修鳳翔府志

卷之七

人物

七十二

班彪扶風人才高而好述作專心史籍斟酌司馬遷前  
史譏正得失作紀傳數十篇所著賦論書記奏事合  
九篇

班固扶風人九歲能屬文誦詩賦及長博貫載籍九流  
百家無不窮究父彪卒續成所作前史綴集漢書上  
兩都賦並詩肅宗雅好文章固數入讀書禁中或連  
日繼夜每行巡狩輒獻上賦頌所著典引賓戲應譏  
詩賦銘誄頌書文記論議言在者凡四十一篇

孔竒扶風人博通經典作春秋左氏刪

杜林扶風人博洽多聞時稱通儒從張竦受學於西州  
得漆書古文尚書出以示弟子衛宏徐巡曰林流離  
兵亂常恐此經將絕何意二子復能傳之古文雖不  
合時務然禮失求之野古文不猶愈於野乎願諸生  
無悔所學古文遂行於世

賈逵扶風人父徽從劉歆受左氏春秋兼習國語周官  
尚書毛詩逵悉傳其業儻有大節明帝拜爲郎與  
班固同校秘書詔會白虎觀講五經異同學者宗之  
稱爲通儒所著經傳義詁及論難百餘萬言

重修鳳翔府志

卷之七

人物

七十三

傅毅扶風人博學能文章帝召爲蘭臺令史拜郎中與  
班固賈逵共典校書毅追美明帝功德乃依清廟作  
顯宗頌十篇由是文名大著於朝

郭威扶風人好讀書謂爾雅周公所制而爾雅有張仲  
孝友張仲宣王時人非周公之制明矣嘗以問揚子  
雲子雲曰孔子門徒游夏之儔所記以解釋六藝者  
也家君云外戚傳稱史佚教其子以爾雅爾雅小學  
也又記言孔子教魯哀公學爾雅爾雅之出遠矣舊  
傳學者皆云周公所記張仲孝友之類後人所足耳

晉

蘇愉扶風人以古文尚書授梁柳

明

何應泰鳳翔人融貫經史文詞邃茂洪武初詔選博聞之士推入國學爲一時冠嘗宣至帷幄屏人咨議泰具以質對退爲忠恕銘以自盟

國朝

王豫嘉扶風人博極典籍長於書法所著有詩古人詞甚富

重修鳳翔府志

卷之七 人物

七十四

盧熙鳳翔人博極群書誦讀不輟嘗曰學以明善復性非爲溫飽計因作勤學論自省

閆萃隴州人學問該博所著有易知錄復齋心課大學述旨諸書

毛儀寶雞人築書室於磻溪上講明正學四方學者日益進所著有磻溪集三字歌批點告子篇書義及四書制義數百篇

張君錫寶雞人博文強記以文學著

義行

漢

苟諫扶風人哀帝時爲上党太守王莽旣殺鮑宣欲滅其子孫諫置宣子鮑永於府中育之後諫卒永送喪歸鄉里後仕光武爲司隸校尉行部至扶風椎牛上苟諫塚云

明

周恕鳳翔人富而多濟關中饑鄰里親友不能自存者出所蓄以相周孀嫂無嗣奉事惟謹嫂歿殯葬如禮入蜀同伴溺死遺貨千金恕謹封貯俟其子至還之

重修鳳翔府志

卷之七 人物

七十五

趙坤河南人寄居鳳翔于古廟得白金值歲大饑出以遍賑於南郭置立義塚以收遺骼寧夏乏食兵變坤輸粟四百石有疑獄十三人蒙赦死准贖銀二百坤卽代輸一百五十金邑令高其義亦捐俸五十金王正鳳翔人有寶雞吏遺二百金訪還之不受謝劉之傑鳳翔人得遺金訪還之

吳國材鳳翔庠生知府唐時明罵流寇死妻孥走城南亂兵塞路國材引匿西山及平資送歸里

王嘉徵鳳翔人歲饑疫破產賑其鄉

楊世達鳳翔人歲大饑散粟數千石以賑閭里又歲施藥療病人

梁禧岐山人出粟五百石助賑奉勅旌表

梁豎岐山人佐邑侯主簿平地糧吏不得行其私

梁沛岐山人邑令于舉鄉飲表其跡曰古貌古心實言實行

李葵岐山人有客藏金於薑黃筐內忘取葵檢還之

王國忠寶雞人出粟千餘石賑饑有司上其事賜勅褒嘉

重修鳳翔府志

卷之七

人物

七十六

路雲程寶雞人急公濟難

楊亂賢寶雞人捐產濟急致貧不悔

高克良寶雞耆民出粟賑饑嘗拾遺金追還失主里有鬻子女者贖而還之舉鄉飲不就

劉守正鄙人嘗輸粟賑饑所假貸有不能償者輒焚其券

呂淮麟遊人急公尚義

趙琪麟遊人隴西訓導里居時山賊李養氣作亂攻城殺掠關西道招撫之賊曰必得正義之士如趙某者

爲質珙慨然請往乃就撫邑境賴安

張弘汧陽人歲饑謂妻曰親故皆困積穀何爲遂開倉賑貸多寡量給又設廠施粥遠者更給以米費約千石全活甚衆詔賜千戶職

**國朝**

楊茂鳳翔人喜周急扶危嘗於市拾把總祁虎官銀八十兩送統兵遊擊處失者免累郡縣給匾獎之

孟永錫鳳翔人族黨貧困靡不周恤涇州民貧不自存以長子鬻永錫家後民喪其次子永錫曰吾不忍流

重修鳳翔府志

卷之七

人物

七十七

離之人煢煢無所依也急歸其子併原券還之又以婢女妻鄰人某姓不責其財而更具粧奩遣焉子聯甲聯科亦有父風歲歉兄弟出粟二百斛減價而糶市價遂平

盧景鳳翔人捐千金於紙坊河創建石橋以利行旅

盧點鳳翔人嘗代贖鄉人之鬻子者三貧不能婚葬者叩無不應又造石橋以利行人

楊發甲鳳翔人素好施邑大饑鬻男女者代爲收贖不能婚葬者爲之贊勸耕無牛具者爲之給置從弟開

甲亦喜周恤嘗造留渠河橋

白成有鳳翔人歲稔出糧千餘石減價平糶族兄遺孤俱幼流離失所成有收而撫育之爲之完娶給貲令其自立又出百金修補鳳鳴橋

曹應祿鳳翔人邑庠奈生夫婦繼歿子方數齡應祿保抱護持俾之成立既娶旋歿妻亦改適有遺孤未滿歲應祿復竭力撫育爲之經營家室

張惠鳳翔人運使程卒遺子鐘瑞毓瑞俱在幼齡惠保護維持兄弟或少有縱逸卽盛稱先世門戶使克樹

重修鳳翔府志

卷之七 人物

七十八

立

程大謨寶雞庠生 國初邑經兵燹逋賦累年里民逃竄十有六七大謨捐貲代輸流亡復業各詣門納券願候償大謨曰吾不欲持此復迫人也悉於堦前焚之

董成梅寶雞人嘗出粟賑饑又勸諭富家協力捐輸分戶散給郡邑歷舉鄉飲正賓雍正九年奉

旨旌表

張學孔寶雞人有過客王楷母病無依學孔館之月餘

供其醫藥比卒復棺斂資送楷歸

劉福衆寶雞人乾隆十三年代完本里軍需銀二百餘兩

霍紳寶雞人賣飯爲業一日飯担中有金五十兩紳收藏待訪數日遺金者還找紳詢實卽還之客酬紳固卻弗受又同邑王之腹張思敬亦俱拾金不昧覓還原主閭里共題表其門

張文元隴州附生以義行稱

張福郿人水覆行舟人爭攘財福獨拯溺活者謝之金

重修鳳翔府志

卷之七 人物

七十九

不受

葉枝松寶雞人有楊氏三子種瓜渭濱河水瀑漲被淹將斃枝松捐金募夫人水撈救得免時有郭宏基張師聖亦共勸其事

倪甲第寶雞人夜有少婦私投甲第正色拒之婦慚而去

毛齡寶雞監生於清水河鳩工捐資鑿山引水溉田利溥

隱逸



商

渭渚農人不知其姓字呂望釣於渭渚三日夜魚無食者望忿脫其衣冠上有農人者古之異人也謂望曰子姑復釣必細其綸芳其餌徐徐而投無令魚駭望如其言初下得鮒次得鯉刺魚腹得書文曰呂望封齊

漢

井丹鄙人性清高未嘗修刺候人

邱訢扶風人傲世不與俗羣郡守召見曰明府所以尊寵人者極於功曹所以榮祿人者已於孝廉一極一

重修鳳翔府志

卷之七 人物

八十

已皆訢所不用也郡守異之遂不敢屈

馬瑤扶風人隱於汧山所居俗化人號馬牧先生

法眞鄙人恬靜寡欲不涉人間事太守請見之眞乃幅巾請謁太守欲以功曹相屈眞曰以明府見待有禮故敢自同賓末若欲吏之眞將在北山之北南山之南矣凡辟公府賢良皆不就

陳

馬樞鄙人嘗曰吾聞貴爵位者以巢由爲桎梏愛山林者以伊呂爲管庫束名實則藟芥柱下之言翫清虛

則糝糠席上之說稽之篤論亦各從其好也乃隱於茅山有終焉之志

**北魏**

魯祈扶風人遭赫連屈丐暴虐避地寒山教授弟子數百人好方術少嗜慾

鄭修北海人隱於岐南几谷中依巖結宇獨處淡然屏跡人事不交世俗

**金**

張中偉郿人伯兄中孚爵原國公經畧涇原仲兄中彥

重修鳳翔府志

卷之七 人物

八十一

爵宗國公經畧秦鳳而偉見關輔多故無仕進意屏居南山下幅巾杖履往來其間人不知其爲貴公子也

**元**

楊儼元末隱陳倉谷中淡然無宦情明初累徵不起

**明**

孫太初年十八嘗棲太白山之巔自稱太白山人党國柱扶風人以闖變高隱卒之日門人謚貞孝先生流寓

周

甯戚衛人居約時客遊於郟郟東南有村曰甯曲

先蔑晉大夫晉襄公卒靈公少晉人以難故欲立長君

晉人使先蔑如秦逆公子雍秦康公送公子於晉多

與之徒衛穆嬴日抱太子以啼於朝宣子與諸大夫

皆患穆嬴且畏偁乃背先蔑而立靈公敗秦師於令

狐先蔑奔秦士會從之

晉

楊軻天水人劉曜僭號徵拜太常軻固辭不起曜亦敬

重修鳳翔府志

卷之七

人物

八十二

而不逼遂隱於隴山

唐

盧照鄰范陽人拜新都尉因疾去官處太白山中以服

餌爲事自傷年纔強仕而沉疾困憊乃作病梨樹賦

杜甫字子美其先自襄陽徙河南舉進士不第困長安

會祿山亂天子入蜀甫避走西川肅宗立自鄜州羸

服欲奔行在爲賊所得至德三載亡走鳳翔謁上拜

右拾遺

孫思邈華原人隱太白山煉神養氣求度世之術隋文

帝輔政徵拜國子博士不就

田遊巖三原人永徽時補太學生罷歸入太白山遇林泉會意輒留連不能去母及妻並有方外志共棲遲山水者三十年

郭休隱太白山有運氣絕粒之術山下建屋百餘間有煉丹洞朝元壇集神閣修正注易白雲諸亭

王休與郭休並居太白山高尚不親勢利日與名僧異人往返尋訪山水自謂結物外遊

元

重修鳳翔府志

卷之七 人物

八十三

毛冲蜀人原任普潤縣尹後謝政隱於岐山周公廟談詩論禮不求聞達鄰邑諸向道者多與之遊居數十年還籍

方外 釋

南宋

曇無成扶風人年十三出家履業清眞聞什公在關負笈從之既至見什什問沙彌何能遠來答曰聞道而至什大善之於是經停務學慧業愈深姚興將亡關中危擾乃憩於淮南中寺著有實相論明漸論

梁

慧球扶風人年一十六出家履行清潔專業禪道

唐

儀光禪師本唐室之族也父瑯琊王與越王起兵伐天后不克而死師方襁褓乳母抱而逃遇一老僧獨行呼師曰小子汝身家破滅將何所適又曰出家閒曠且無憂畏汝欲之乎因攜至桑陰下削髮爲僧後十年唐室中興求瑯琊王後至京引見慰問賞賜優給復以爲王師不願居終南山興法寺

重修鳳翔府志

卷之七 人物

八十四

太白山有胡僧不知幾百歲眉長數寸身不製繒帛衣以草葉有降龍制虎之術商山趙叟采茯苓深入太白嘗值此僧

佛陀禪師居鳳翔府法門寺常持一串數珠念三種名號一釋迦二元和三佛陀自餘是甚麼椀躡邱乃過一珠終而復始事迹異常人莫能測

佛陀薩嘗獨行岐隴間貌類童騃好詬辱羣僧衣食有餘轉均於里中窮餓者開成五年夏六月召里中民告曰我今夕死矣汝爲我塔座其尸果端坐而卒

元安禪師麟遊人夾山將寂時語曰石頭一枝看看滅  
矣師曰不然他家自有青山在山曰苟如是卽吾宗  
不墜

**五代**

阿闍黎胡僧住鳳翔行高知前事末帝在藩屢與僧言  
甚重之及卒帝嗟惜之命翰林學士爲誌銘

**明**

惟安郿人年十歲爲人牧羊有省遂薙髮受戒走五臺  
禮空印和尚深有發明後北遊至乘願禪院示寂

重修鳳翔府志

卷之七 人物

八十五

懶翁仕本蜀李氏子官彭州太守忽自歎曰三生原是  
田家人一念差來墮縉紳破衲蒲團瓢笠杖依前還  
我水雲身遂棄妻子挂冠而遁隱於隴州方山一日  
沐浴整衣與大衆別行者問何往曰老夫天堂也去  
得地獄也去得言訖自卧而逝

**周**

仙

弄玉秦穆公女善吹簫與簫史共登樓吹簫作鳳凰音  
鳳從天降跨鳳而升

**□**

馬成子扶風人周秦間棄家入伯陽川遇一童子授以胎元煉氣法乃白日飛昇

**漢**

車子侯扶風人漢武帝愛其清淨積遷其位至侍中一朝語家云我今補仙官此春應去至夏當暫還還少時復去如其言武帝思之乃作歌曰嘉幽蘭兮延秀蕈妖媯兮中溘華斐斐兮麗景風徘徊兮流芳皇天兮無慧至逝兮仙鄉天路遠兮無期不覺涕下兮霑裳

重修鳳翔府志

卷之七

人物

八十六

靈壽光扶風人年七十餘得朱英丸方合而服之轉少壯獻帝時光已二百二十歲常寓江陵田家無疾卒田殯埋之百餘日人復遇之寄書與田田得書發棺惟履存

**晉**

梁謚扶風人初事鄭法師於樓觀能飛行變化一日謂門人曰有友召我於南峰今往矣輒冠服而出雲氣繚繞不見其形惟鼓吹之音隱隱從空去

馬儉扶風人苻秦中從孫徹學道授五符真文行氣導引

能役神制邪姚萇聞而異之往召不至年九十八

### 南北朝

王延扶風人師焦真人授三洞秘訣文帝時詔主仙都觀謂門人曰吾欲歸西嶽乃委化於觀中帝遣使護葬西嶽及就壙但空棺而已

### 唐

申宗開元中進士張佐嘗南次鄆杜郊行見有老父乘青驢背鹿革囊問所從來曰吾宇文周時扶風人也姓申名宗周行天下迨茲二百餘歲所見異事甚多

### 重修鳳翔府志

### 卷之七 人物

八十七

並記在鹿革中因啟囊出二軸書佐不能讀其夕佐畧寢及覺已失叟後數日有人於炭谷湫見之叟曰爲我致意張君佐遽尋之不復見

契虛本姑臧李氏子祿山破潼關元宗幸蜀契虛遁入太白山採栢葉食一日有道士喬君導之遊稚川至一殿上有具簪笏者憑玉几而坐命契虛謁拜曰此眞君也眞君召契虛訊曰爾嘗絕三彭之讎乎契虛不能對眞君曰慎勿久留於此契虛歸因廬於太白山絕粒吸氣貞元中徙居華山下竟不知所在



許棲巖岐陽人舉進士習業於昊天觀時韋臯鎮蜀巖將爲入蜀之計自入西京市一馬歸泊登蜀棧巖與馬俱墜崖下見一洞穴行而乘之約十餘里忽及平川有一道士卧於石上二玉女侍之云是太乙眞君巖卽以行止白君曰爾好道乎曰曾讀莊老黃庭命坐酌小杯以飲之曰此石髓也居半月思家求還太乙以所乘馬送之謂曰此馬吾洞中龍也子到人間放之渭曲勿復留之旣別逡巡已達虢縣問鄉人年代已六十年出洞時二玉女託買虢縣田婆針乃市之繫馬鞍上放之化龍而去巖大中未也復入太白山

重修鳳翔府志

卷之七

人物

八十八

**宋**

于元隱莫知所從來有老人導之遊雞足山十餘年來鳳翔郡守召與語異之延於家元隱求一室置大斛貯水扃戶睡三月守日遣人伺之又三月忽坐水斛中臨卽吳伸道以職事如秦遇於途款語移時至秦以語守守駭曰安有是就視則尚寐也大觀元年詔赴闕旣而還山卽清平軍上清太平官構別位以居

常以大洞真經五行六字氣轉相傳授偃蹇者起行  
羸瘵者充盛四方言大洞者皆以元隱爲師  
石泰扶風人得金丹之道以醫藥濟人不受謝金壽一  
百三十七紹興二十八年中秋日尸解後二年有人  
復見於羅浮山

薛道光雞足山人雅意金丹導養宋徽宗崇寧五年寓  
郿壽一百十四歲尸解去明年沙道昭復見於霍童  
山

元

重修鳳翔府志

卷之七 人物

八十九

邱處機登州棲霞人金大定間隱居蟠溪日乞一食行  
則一簣人謂之簣衣先生

董守志元太祖時人居汧隴慕神仙導引之術一日謂  
其徒曰諸仙邀會蓬萊矣遂逝

李妙成岐山人古澹清淨元時築靜明庵於汧陽年踰  
大耋童顏不衰後人名其結庵處爲悟仙莊

明

張君實在金時修煉寶雞縣之金臺觀洪武初復來寶  
雞與西關道士李白雲交契時往來長安西郭土室

中神情朗異鬚張如戟身垢不堪西郭人因號爲邈  
邊張喜與郭民劉寡蕩遊嘗以身垢爲丸治人疾病  
後他適給事中胡濙奉命訪張三丰遇寡蕩言狀以  
爲卽三丰也有生員張恪者於周公廟朝陽洞遇三  
丰敝衣垢面恪不爲禮時大雪方炊飯三丰須臾自  
外持菜至如新擷於圃云自成都取來恪出視雪中  
無迹知爲仙將別去告恪曰吾元元子張三丰也問  
所欲曰苦無記性乃吹耳連囑曰吾令汝聰明自是  
讀書過目輒不忘後舉永樂甲午解元

重修鳳翔府志

卷之七 人物

九十

唐

索姑扶風人性至孝恬淡不喜塵俗事其父貿易隴西  
姑請爲買白馬及父歸次日五鼓姑乘馬馳去遺線  
於路至盤屋青山跌坐而化家人隨線迹之得其處  
居人神之爲立廟焉

方伎

周

卜徒父魯僖公十五年秦伯伐晉卜徒父筮之吉涉河  
侯車敗詰之對曰大吉三敗必獲晉君其卦遇蠱曰

千乘三去三去之餘獲其雄狐夫狐蠱必其君也蠱之貞風也其悔山也歲云秋矣我落其實而取其材所以克也實落材亡不敗何待三敗及韓戰於韓原秦獲晉侯以歸

**漢**

曹喜扶風人精篆書衛恒撰四體書勢其序篆書曰秦時李斯號爲工篆漢建初中扶風曹喜少異於斯而亦稱善邯鄲淳師焉畧究其妙韋誕師淳而不及也

**魏**

重修鳳翔府志

卷之七 人物

九十一

馬鈞扶風人明帝時爲給事中明帝曾詔作指南車時都內園地患無水灌乃作翻車令童兒轉之灌水自覆更入更出復爲百戲以大木彫構其形若輪平地施之潛以水激設爲女樂舞象至令木人擊鼓吹簫奇巧百端雖古公輸般近世張平子不能過也

**北魏**

王伯達扶風人善相盧淵年四十嘗詣長安將還諸相餞送者五十餘人別於渭北伯達曰諸君皆不如此盧郎雖位不副實然德聲甚盛望踰公輔後三十餘

年當制命關右願不相忘後淵果爲南安將軍督關右諸軍事

**唐**

李淳風岐州雍人通羣書明步天歷算貞觀中得秘讖言唐中弱有女武代王以問淳風對曰其兆旣成已在宮中又四十年而王夷唐子孫且盡帝曰我求而殺之奈何對曰天之所命不可去也徒使疑似之戮淫及無辜且四十年而老老則仁雖易姓不能絕唐若殺之復生壯者則陛下子孫無遺種矣帝采其言

重修鳳翔府志

卷之七 人物

九十二

淳風於占候吉凶若節契然以勞封樂昌縣男撰麟德歷代戊寅歷候者推最密自秘閣郎中復爲太史令卒

田佐元號縣人憲宗末年銳於服餌詔天下搽訪奇士佐元自言有奇術能變瓦礫爲黃金自白衣授本縣令

馬處謙扶風人病瞽父俾其學易以求衣食嘗於安陸鬻筮自給有一人謁筮謂馬生曰子之筮未臻其妙我有秘法能從我學之乎馬生隨往受星算之訣言

事甚驗趙匡明棄荆入蜀令杜光庭密問享壽幾何對曰主上受元陽之氣四斤八兩果七十二而崩四斤八兩卽七十二兩也

支仲元鳳翔人工畫人物筆法師顧陸緊細有力清潤不俗宋高宗題作晉六朝者多仲元所作

跋異汧陽人工畫佛道鬼神洛中福先寺有畫壁

**宋**

曾若虛隴州道士善醫尤得鍼砭之術里有寡婦再適人遘疾且卒經日而心間尚暖若虛引鍼鍼之卽時

重修鳳翔府志

卷之七 人物

九十三

而蘓良久語曰夢與故夫相隨出遊展轉不捨俄而故夫爲一物刺中不能履步由是獨行忽若夢覺郡人詣若虛詢之若虛曰向之所鍼乃黃帝鍼入邪穴也

**明**

郭伯郁郿縣人精通天文歷數善識緯之術任欽天監春官正名重京師洪武中漏刻博士元統䟽言七政之源有遲疾順逆伏見不齊其理深奧實難推演臣聞磨勘司令王道亨有師郭伯郁者精明九數之理

深通歷學之源若得此推大統歷法度幾可成一代之制

雜紀

漢

馬少游援從弟嘗謂援曰士生一世但取衣食裁足乘下澤車御款段馬爲郡掾吏守墳墓鄉里稱善人斯可矣致求盈餘但自苦耳後援征交阯封侯述前語曰當吾在浪泊間交虜未滅下潦上霧毒氣薰蒸仰視飛鳶跼跼墮水中追念少游此語何可得也

重修鳳翔府志

卷之七

人物

九十四

張湛字子孝矜嚴好禮動止有則居處幽室必自修整雖遇妻子若嚴君焉在鄉黨詳言正色三輔以爲儀表人或謂湛僞詐湛聞而嘆曰我誠詐也人皆詐惡我獨詐善不亦可乎建武間拜光祿勳嘗乘白馬輒進諫光武每見湛輒曰白馬生復諫矣

魏齊卿扶風人危言深論不隱豪強自公卿以下莫不畏其貶議屣履到門

蘓朗扶風人以僞言圖讖得罪下獄死

竇憲融曾孫以女弟立爲皇后拜爲郎和帝卽位太后

臨朝憲以侍中內幹機密出宣誥命兄弟皆居親要  
自求擊匈奴大破北單于於稽落山詔拜大將軍更  
封冠軍侯不受封遂將兵出鎮涼州明年破北虜於  
金微山匈奴既平威名大盛以耿夔任尚爲爪牙鄧  
疊郭璜爲心腹互相交結出入禁中遂共圖爲弑害  
帝陰知其謀收捕疊璜等下獄誅遣謁者收憲大將  
軍印綬更封冠軍侯及弟篤景環皆遣就國尋使相  
迫令自殺

射服扶風人本姓謝嘗爲將軍出征天子以謝服非令

名改爲射子堅與弟援因三輔饑亂入蜀俱仕後漢  
孟他扶風人靈帝時中常侍張讓專朝政讓監奴典護  
家事他破產賂監奴奴問所欲他曰願得卿曹拜耳  
奴許諾時賓客求見讓者或累日不得通他甫到奴  
皆迎拜徑將他車獨入衆人大驚異俱謂他與讓善  
爭以珍物遺他他盡以賂讓讓喜卽拜涼州刺史生  
子達仕蜀爲宜都太守左將軍被圍達擁兵不救先  
主恨之達懼罪遂降魏魏主善之拜散騎常侍又加  
建武將軍封平陽亭侯旣爲文帝所寵又與桓階夏



侯尚親善及文帝崩階尚皆卒達自以羈旅久在疆場心不自安諸葛亮聞之陰欲誘達數書招之達與相報答魏興太守中儀與達有隙密表達與蜀潛通司馬懿遣叅軍梁幾察之又勸其入朝達驚懼復叛魏後懿攻新城達被圍旬有六日而敗焚其首於雒陽四達之衢

士孫奮字景卿扶風人少爲郡五官掾起家積貲財至一億七十萬富聞京部而性鄙吝梁冀因以馬乘遺之從貸錢五千萬奮以三千萬與之冀怒乃告郡縣

重修鳳翔府志

卷之七

人物

九十六

誣奮母爲其守藏婢云盜白珠十斛紫金千斤以叛遂收考奮兄弟死於獄悉沒貲財入冀家

宋梟扶風人靈帝時代左昌爲隴州刺史梟患多寇叛謂長史蓋勳曰涼州寡於學術故屢致反暴今欲多寫孝經令家家習之庶或使人知義勳諫曰昔太公封齊崔杼弑君伯禽侯魯慶父篡國此二邦豈乏學者今不急靖難之術遽爲非常之事旣足結怨一州又當取笑朝廷勳不知其可也梟不從遂奏行之後被詔書詰責坐以虛慢徵

**魏**

王忠扶風人少爲亭長漢末三輔亂隨輩南向武關值  
婁子伯爲荊州遣迎北方客人忠不欲去因率等伍  
逆擊之奪其兵聚衆千餘人歸操拜中郎將從征討  
後爲揚武將軍都亭侯

**南宋**

魯爽郿人少有武毅父軌仕魏軌死代爲荊州刺史粗  
中使酒數有過失太武怒將誅之懼乃奔文帝爲司  
州刺史孝武帝卽位謀反左將軍薛安都刺殺之

**重修鳳翔府志**

卷之七 人物

九十七

**隋**

司馬德戡扶風人便辟俊辯多姦計隋開皇中自侍官  
從征討進位正議大夫遷武賁郎將煬帝甚昵之隋  
末大亂乃從宇文化及反弒煬帝後懷怨化及奪其  
兵柄又謀襲化及化及命送幕下縊而殺之

**唐**

和逢堯岐山人武后時負鼎詣闕上書自言願助天子  
和飪百度坐流莊州十餘年乃登進士突厥請尚公  
主逢堯以御史中丞攝鴻臚卿報可因諷以慕義突

厥遂稱臣遣子入朝逢堯擢戶部侍郎

王旭珪孫見酷吏傳

元載岐山人與李輔國相締昵拜同中書門下平章事  
代宗立進拜中書侍郎未幾判天下元帥司馬與盜  
謀殺李輔國復結中人董秀刺取密旨探微揣端無  
不諧契其後驕奢淫佚以至道路目語帝積怒賜自  
盡妻及子並賜死發其祖父塚斲棺棄屍籍其家  
竇參扶風人性峭直果於斷爲監察御史舉錯無所忌  
或決大議德宗器之同平章事後因譖陸贄貶爲柳

重修鳳翔府志

卷之七 人物

九十八

州別駕

楊炎天興人德宗卽位拜門下侍郎同平章事初定令  
有租賦庸調法開元承平久不爲版籍百役並作賦  
斂之司數四莫相統攝權臣巧吏託進獻爲贓盜者  
動萬萬計故課免於上而賦增於下炎疾其弊乃請  
爲兩稅法戶無主客以見居爲簿人無丁中以貧富  
爲差其田畝之稅則以大歷十四年墾田之數爲準  
而均收之夏稅盡六月秋稅盡十一月歲終以戶賦  
增失進退長吏而尚書度支總焉天下利之炎初矯

厲志節頗得名既傳會元載伎 根中不能自止睚  
眦必讐果於用私終以此及禍

